


蘇州府志

卷五十六



蘇州府志卷第九十九

人物二十六

常熟縣

明

孫

艾

子冊政

七政

子林

森

張文麟

任順

周炯

褚圻

父璵

時中

鄒韶

弟武

蔣欽


吳寅

曾孫士志

徐明俊

錢仁夫

丁仁



中國社會科學院  
南京研究所藏書

唐天恩

顧達

鄒泉

湯繼文

陳迥

曹逵

周鳴鳳

章榮

陳鈇

顧玉柱

陳察 弟寰

丁奉

歸椿

王舜漁 兄舜耕

鄧韞 子廷薦

錢學

朱木

周懋

錢璠

盛賚汝 許河

陳如綸

趙士端

嚴訥 子治澤

徐栻

錢有威

邵圭潔 子整

陸一鳳 孫崇禮 問禮

王嘉言

何鈇

章宗實

錢泮 徐察

顧坤

瞿景淳 子汝稷 汝說

錢之選

劉泉

孫樓

陳瓚

錢順德 兄順時 子世揚

韋煥

宗禮

譚照 弟曉

周伯

蔣以化

沈應科 孫春澤

儲國本

唐一麟

陳國華 子星樞

王之麟 子宇春

陸化淳 弟化熙

袁光宇

林德

蔣以忠

趙用賢 父承謙 子琦美 隆美 孫士春 十錦

黃門

陳喆

黃時雨

顧雲程

陸枝

顧雲鳳

薛志學

席允信

翁憲祥 弟愈祥

陳禹謨

顧雲鴻 邵濂

宋奎光

陳必謙

孫朝肅 弟朝讓

龔立本

錢希言

瞿純仁

吳正一

嚴激

管一德

徐待聘 從弟待任

顧大章 弟大韶 從弟大武 子麟生

魏浣初 弟冲

瞿式耜

許士柔

馮復京

薛道文 子紹奎

何允泓

王夢鼐 兄夢鼎

蔣 棻

張履端

陳煒卿 子壻芳

項志靈 屈坦之等

徐守質

徐守貞

錢謙貞 子孫保

毛 晉 父清 子辰

陳三恪

嚴 棻

許孟卿

陳黃道

張承慶 沈堂等

徐 懌

馮知十

許重熙

錢安修

趙 牧

王奕昌

許士儉 從弟士驥

桑升吉

鄧大臨

秦君台

石 電

蘇州府志卷第九十九

人物二十六

常熟縣

明

孫艾字世節父紀官刑部員外郎艾任俠父喪致十郡客來弔  
 盡傾其家學詩於沈周與崑山周詩長洲吳寬皇甫冲兄弟  
 友善盤山得美泉剗崖石緣高下結廬以待游者篤故舊周  
 窮乏坐此家益貧自號西川翁有詩集若干卷子舟乘舟進  
 士官工部主事妻子七政字齊之七歲能詩與王世貞汪道  
 昆諸人游才名籍甚所居西爽樓清暉館蓄古彝鼎書畫客



至觴咏其中晚年貧甚皆割去二子林森皆能詩森舉萬曆  
丙午鄉試官至高州同知錢志

張文麟字公端弘治乙丑進士正德末任建寧知府建寧饒郡

也文麟持廉潔風之約束吏猾不假毫髮抑兼并豪右而衣

食鰥寡嘗梓鄉先儒真文忠集吏部數言建寧守最當遷文

麟不能折節下上官有所抵牾遂遭萋菲投劾歸福建通志

任順弘治間知德化縣縣有曾雕兒好告訐為民患順至以德

化之不悛乃置之法惻然遣之曰爾何不為嘉禾而為稂莠

乎自是德教蒸被狴獄空虛福建通志

盧翊字鳳翀父琮海陽令有廉操嘗平反死罪二十人以直道

忤其守罷官翊弘治庚戌舉進士授新喻令政尚簡易以治

閩內艱服闋知獲嘉縣里豪久負稅挾刃自衛翊捕寘於法

租遂入縣有屯卒調自澤州其千戶橫邑中翊持其骹法事

千戶叩首謝以薦拜御史出理山東軍政再巡按廣西當猺

獠竊發兵疲民敝翊加意撫輯柳度叛亂被旨錄戎功劉瑾

擅國以苛刻取賂會省城火論翊與三司失救罪時已遷湖

廣僉事猶不免罰又以功冊稽緩為罪停其官瑾敗復職改

任川南兼視水利疏鑿都江堰以灌民田歲連大熟天全六

番招討司所統礮門土軍以重斂作亂蜀中大震鎮巡官議

進兵翊以為非計乃屬翊招撫之皆詣軍門降瞿塘千戶徐

啟夷種也白晝行劫官兵追之深入險阻翊訪其所善指揮某誘而縛之遂伏法遷副使守禦松潘其地介羌戎爲全蜀屏蔽松守卒自成都調分諸戍勞逸不均卒怨多逃翊爲定更戍法又嚴衛長斂索之禁其亂始弭自小河抵棧閣夙廢壞商旅不通翊調工治之上人名爲盧崖閣龍州之西有鐵索橋土官叛亂多斷橋以守兵不得進翊命益其索而上施之板行者稱便遷雲南參政賓州洱海之界有鐵索箐夷諸熟夷爲寇輒導之入擾時方議剿翊條其利害謂夷未易殄請於姚安界中創大堡擇將率其屬以守仍諭各堡堅城濬川夷竊發則相狙擊使生熟夷不得合可以取勝遂用其議

洱海雲南之西常苦旱其地有品甸開砦二陂可以儲水安南坡諸處有美泉可灌溉翊諭民治二陂築梁玉山壩障水以入田歲比登公私有儲粟遷廣西右布政使尋卒年六十六翊器度弘裕是非不苟歷官久而門闔蕭然不異寒窶所至以君子目之

鄧志

周炯字光宇少撰萬言書欲上父木抑止之弘治庚戌舉進士授工部主事監稅浙江進員外郎郎中時羣璫用事費官物無藝炯按籍以給視其可緩者輒移停之爲羣小所怨會西番叛詔五月出師事起猝遽炯調軍械整暇如常時一日劉瑾令官校來問虞衡司所峙戎器幾何炯告以數藏於庫蓋

瑾已有逆志故語塞之如此遷雲南右參議麗江軍民府爲  
羈縻郡巡歷所不及巡按張璞屬炯諭下之知府木定以貨  
餽炯峻卻之定再拜願盡力守邊十八寨久弗靖邊臣議征  
之炯獨持不可後卒如其議所全活甚衆遷右參政職理戎  
伍撫臣薦炯才命督糧儲兼理鹽法剷除奸弊甚多久之轉  
陝西苑馬寺卿遷山西右布政使轉左首禁官買病民數事  
同僚多不便按部御史所遣人有擾州縣者炯治之御史遂  
撫他事劾炯炯適以父喪歸他日御史言炯治狀方召用已  
卒矣

鄧志

時中字大本弘治庚戌進士知絳州絳有宗藩號難理中端已

以治皆斂飭無干法者擢南京工部員外郎絳民遮道送車  
不得行在部時中官有因役入賂中發之外艱歸服闋補刑  
部凡擬案多自爲之吏無所吝其奸累辨枉抑以能稱陞山  
西按察司僉事爲劉瑾所誣貶衡州府通判陞嚴州府同知  
瑾誅復舊職奉敕飭廣東清遠兵備猺獠寇連州中率兵討  
平之陞副使備兵海南黎據峒險常出抄掠畏中威惠莫敢  
肆指揮徐某獲罪暮夜懷金請免中執而治之中性簡易治  
尙清嚴所至有聲

鄧志

褚圻字弘望父瑛以鄉薦官國子博士有學行圻弘治癸丑舉  
進士授刑部主事遷員外郎慎於聽讞有寃濫必申之不以

成案為難湖廣參將趙晟殺指揮某其家訴於朝圻往鞠之圻知晟力能移獄兼程以至按論晟死擢知寧波府舉荒政修廢堰建小學逆瑾索貨外郡圻拒之遷廣西按察副使尋

致仕

鄧志

鄒韶字性之弘治癸丑進士授南京工部主事革蘆鈔宿弊部委督磚運於儀真簡靜不擾晉刑部員外郎擢吏部郎中遷兗州知府訟牒紛委剖決如流逆瑾亂政遣卒四出偵事取賂韶遂疏懇致仕初瑾欲逮韶而韶得請去乃摘二罪俾以米贖不愜復加譴令再贖瑾敗得免以薦擢山東左參政命下而韶已卒弟武字靖之弘治甲子舉人歷官潯州知府亦

以靜退稱

鄧志參管  
龔二志

蔣欽字子修弘治九年進士授衛輝推官擢南京御史數有論奏正德元年劉瑾逐大學士劉健謝遷欽偕同官薄彥微等切諫瑾大怒逮下詔獄廷杖為民居三日欽獨具疏曰劉瑾小豎耳陛下親以腹心倚以耳目待以股肱殊不知瑾悖逆之徒蠹國之賊也忿臣等奏留二輔抑諸權奸矯旨逮問予杖削職然臣思畎畝猶不忘君况待命衽席目擊時弊烏忍不言昨瑾要索天下三司官賄人千金甚有至五千金者不與則貶斥與之則遷擢通國皆寒心而陛下獨用之於左右是不知左右有賊而以賊為腹心也給事中劉滄指陛下問

於用人昏於行事而瑾削其秩撻辱之矯旨禁諸言官無得妄生議論不言則失於坐視言之則虐以非法通國皆寒心而陛下獨用之於前後是不知前後有賊而以賊爲耳目股肱也一賊弄權萬民失望愁歎之聲動徹天地陛下顧懵然不聞縱之使壞天下事亂祖宗法陛下尙何以自立乎幸聽臣言亟誅瑾以謝天下然後殺臣以謝瑾使朝廷一正萬邪不能入君心一正萬欲不能侵臣之願也今日之國家乃祖宗之國家也陛下苟重祖宗之國家則聽臣所奏如其輕之則任瑾所欺疏入再杖三十繫獄越三日復具疏曰臣與賊瑾勢不兩立賊瑾蓄惡已非一朝乘間起釁乃其本志陛下

日與嬉游茫不知悟內外臣庶凜如冰淵臣昨再疏受杖血肉淋漓伏枕獄中終難自默願借上方劍斬之朱雲何人臣肯少讓陛下試將臣較瑾瑾忠乎臣忠乎忠與不忠天下皆知之陛下亦洞然知之何仇於臣而信任此逆賊耶臣骨肉都銷涕泗交作七十二歲老父不顧養矣臣死何足惜但陛下覆國喪家之禍起於旦夕是大可惜也陛下誠殺瑾梟之午門使天下知臣欽有敢諫之直陛下有誅賊之明陛下不殺此賊當先殺臣使臣得與龍逢比干同游地下臣誠不願與此賊並生疏入復杖三十方欽屬草時燈下微聞鬼聲欽念疏上且掇奇禍此殆先人之靈欲吾寢此奏耳因整衣冠

立曰果先人盍厲聲以告言未已聲出壁間益悽愴欽歎曰業已委身義不得顧私使緘默負國為先人羞不孝孰甚復

坐奮筆曰死即死此橐不可易也聲遂止杖後三日卒於獄年四十九瑾誅贈光祿少卿嘉靖中賜祭葬錄一子入監明史

錢志南都賜諡忠烈又龔志欽父綺通經博古欽歿後尚善飯享年九十有六

吳寅字敬夫弘治乙卯舉人授武昌同知巨盜劉七殘河汴官

捕之急入於鄂民皆逃寅調戰守具民以無恐巨盜趙璲變

形服匿境內寅設計擒之械致於京再遷河東都轉運使同

知凡為嗾司多損譽寅涖職謹名特起御史與寅不咸加擴

劾寅亦奏辨竟解職還單車上道至無以為行鄧志曾孫士志

字伯高父歿哀慟常絕而復蘇踰小祥目失明耳失聰口失

音血枯骨立見者以為人腊免喪未幾卒錢謙益傳 乾隆志曰謙益於孝子

傳內附載寅事謂寅率舟師射殺劉六與史傳鄧志俱不同又有徐明俊者亦以孝死鄉

人與士志並稱孝子云通志

錢仁夫字士弘號東湖少學於邑人陳九疇聞性理之學弘治

己未舉進士時年五十四矣或勸減年以便仕進仁夫曰方

仕而為欺罔乎授都水主事分司臨清領衛河提舉司兼理

漕渠聞事會省冗官又兼理磚廠還朝改虞衡司故事輪役

匠免役出銀解部歲久匠戶亡耗過半而官徵不已里役以

為累仁夫議請徵匠以補其缺悉蠲其舊負者會孝宗以逃

匠問尚書曾鑑鑑對如仁夫議乃盡除無徵者監稅浙江還朝遷營繕員外郎逆瑾方竊政遂引疾致仕後瑾益張誣逮中外官一時清望皆不免人始服其明決性好客座常滿內行修謹與弟信夫友愛置粟義莊以助族人博綜羣籍為文雅贍詩和緩善楷隸畫山水竹石有逸致

鄧管二志合纂

丁仁字明德壯歲多病終日卧幃中以是該覽載籍弘治己未舉進士授行人陞司正正德中持節冊封慶符王藩府饋遺皆峻謝陞南京屯田郎中蘆洲歲課銀二萬五千餘兩往時當司專出納仁請委吏受銀於堂廡郎中無所預擢廣西參議督糧餉歲大歉仁請糴粟於鄰省躬往監運軍餉獲濟賓

州梗化民以聖塗屋自別仁使人敦諭州人素德仁不敢肆以疾致仕

鄧志

唐天恩字堯仁敏曾孫弘治十一年舉於鄉授葉縣知縣正德六年盜起河朔天恩增城塹池繕修器械流賊趙璫徐彥明等哨馬千餘臨城天恩率兵奮戰擒戮數十人賊引去是歲十月劇盜劉七徒黨尤盛抵城下攻圍甚急天恩嬰城固守二十餘日外無強援城遂陷賊執天恩及其父政懸於縣庭叢射殺之庶母任氏二妹皆遇害妻錢氏子詩卧亂屍下得脫事聞贈光祿少卿賜祭蔭一子仍賜子孫為儒籍復其身後巡按御史華珩疏請敕建專祠有司春秋致祭

鄧管翼三志合纂

陳察字元習弘治十五年進士授南昌推官正德初擢南京御史尋改北劉瑾既誅武宗猶日狎羣小察偕同官請務講學節嗜慾勤視朝語甚切直以養親歸家居九年始赴補會帝將親征宸濠察請無行而亟不罪已詔忤旨奪俸一年諭羣臣更諫必實極典俄巡按雲南助巡撫何孟春討定彌勒州以功增秩世宗卽位疏言金齒騰衝地極邊徼旣統以巡撫總兵又有監司守備分轄無事鎮守中官因劾太監劉玉都督沐崧罪詔並罷還嘉靖初按四川請罷鎮守中官不聽錦衣百戶王邦奇誣大學士費宏石瑄陰庇楊廷和將興大獄給事中楊言抗疏諫帝親鞫言落其一指察大呼曰臣願以

不肖軀易言命不忍言獨死帝目懾之察不爲動退具疏申理且請下王邦奇於獄直聲震朝野巡視京營與給事中王科極陳武定侯郭勛貪橫狀擢南京太僕少卿疏辭因請召前給事中劉世賢等二十餘人帝怒責以市恩要名貶遠方雜職給事中王俊民鄭一鵬論救皆奪俸察補海陽教諭累遷山西左布政使入爲光祿卿十二年以僉都御史巡撫南贛居二年乞休因薦前都御史萬鏜大理卿董天錫等十四人可用吏部請從其言帝奪部臣俸責察徇私妄舉斥爲民察居官廉旣歸敝衣糲食而已明史弟寰字原大正德辛未進士選庶吉士授檢討大內災上書勸修省奪俸半歲謝病歸

嘉靖初召仍前官預修武宗實錄請復古左右史記言動又請為建文諸臣立傳不報遷南京國子司業改北時議罷孔子王號言者遂欲併殺文廟器物寰持不可曰陛下稱孔子為先師蓋尊之也尊之則闕里制當益不當裁上是之俄陞南祭酒尋致仕歸寰清操不及其兄而近情勝之

管志參陳祖范昭文

新志

顧達字德字舉進士授臨川令運軍恣橫達疾驅入縣拘其已兌者每石予耗三升以其餘抵正兌二萬餘石裁驛遞辨疑獄為士民所稱布政司役蔡堂數撻縣政達得其攬納鹽鐵奸賊事論戍堂屬守備姚太監求解達不從庫有羨銀二千

餘兩吏毛昌夜獻之達罪昌而以銀解郡主簿申屠祥因事入賄不納行謗於巡按御史奏調龍泉教諭未幾遷魯山令

陞南京刑部主事持法平恕遷郎中卒

鄧龔一志合纂

丁奉字獻之號南湖少孤力學舉進士授南京文選主事晉驗封郎中丁內艱歸有旨擢用吏部尚書陸完手書促赴奉反致書完勸其功成身退遂以原官致仕年方三十八耳其後完敗交游多株連奉以前書免於累士論高之已乃沈酣六籍巡撫歐陽鐸餽金刻其集奉念故友湯繼文五喪未舉即

以賻之

管龔一志合纂

鄒泉號嶧山

錢志字子靜

少美風儀長而有聲庠序間訓誨諸生精

研書義游其門者多取科第晚棄舉子業著書澗谷山中巡按御史甘士价造其廬咨訪古禮稱為吳與弼之流卒年七

十餘無子

管志

歸椿字天秀居白茆白茆在江海之壖高仰瘠鹵浦水時浚時淤椿相水遠近通溪置閘用以灌田椿好施舍田又日墾人稍稍就居之遂為廬舍市肆如邑居吳中多利水田椿家獨以旱田諸富室爭逐肥美椿獨取其磽者日顧吾力如何田無不可耕者築堡九澗俗呼歸家城

歸震川集

湯繼文字引之正德辛未進士授南京兵部主事進員外郎郎中奉職詳慎多所釐革官校恣橫繼文痛抑之有勳貴抵法

當戍邊黃緣請脫繼文執不從陞福建參議分守建寧諸郡臨事不少回假閩連歲稔軍儲告缺詔蠲民租值有秋科臣議將加征繼文言詔旨不可違軍儲當別措卒從其議長樂有豪據紫陽書院繼文勒還之讞獄必期得情輒行駁有慮囚使者臨境有司以成案為言繼文曰拘案斷而故入人罪可乎抗論得白者甚眾遷湖廣副使分巡湖南時衡永多盜警繼文謂吏失職則民失業盜所由起命有司緩征節費和糴以賑仍戒守將固守要害毋黷武以覲功盜旋平以巡歷

冒春瘴得疾卒

鄧志

王舜漁字于澤正德丁丑與兄舜耕同舉進士授工部主事分

司浙江倖臣江彬方用事中官以賂得預司事怙權橫征舜  
漁以法裁之課入命貯錢塘仁和二縣庫鎔銖無所與宸濠  
反浙江鎮守太監畢真謀應之巡按御史張縉知舜漁忠略  
移司入城與謀議真一日召縉與舜漁飲將戕之座上舜漁  
帥士兵千餘人以從見兵械森列縉真曰豈備盜藩耶正當  
設於城上耳命左右立撤之酒半日縉先行引觥與真痛飲  
而出真氣索改刑部歷員外郎遷山東僉事督武定兵備州  
方有警舜漁修軍政躬習騎射知州姚遜貪暴劾罷之丁外  
艱歸服闋補原官分巡遼海東甯道修築邊牆延袤千里有  
挾中官勢擅支諸衛俸給者舜漁捕寘於法豪猾持官長短

結黨攫財者亦遣戍極邊一道震懼遷副使整飭臨清兵備  
遼人數千泣送有圖其像而去者臨清當道衝奸宄所窟穴  
舜漁訓練士卒安撫商賈上下頌其治巡河郎中在臨清繫  
囚五十餘人久不決舜漁察其寃命釋之又按考州庫贓罰  
銀有隱匿舜漁持之急遂據他事許奏詔令二人候勘於家  
舜漁事得白吏部方擬薦用無何卒年四十七舜漁有宏才  
應變處艱不見聲氣風神明爽議論英發鄧冀二志合纂  
管志云舜漁兄舜  
耕字于田初任廬陵知縣擢御史巡理長蘆鹽法上便宜七  
事自是鹺政疏通再巡按河南謝絕請託歲大旱減損厨傳  
餽遺人多銜之謫光  
州判官改濱州卒

陳迨字良會宋温州教授元大後正德丁丑進士除惠安知縣

調福清擢御史同官朱泚馬明衡疏言昭聖皇太后生辰不宜免朝賀帝怒下詔獄拷訊迨繼諫帝愈怒廷杖下獄謫合浦主簿時王守仁總督兩廣檄所屬選諸生之俊拔者聘迨為師講道靈山書院起知新喻縣再遷大名府同知尋陞福建僉事備兵福寧道古田相傳礮發羽書旁午處州民操刃來爭迨引兵入深阻俘賊黨封其山遷河南副使帝幸承天迨扈駕中官要賄不得坐供具不辦下獄為民後以九廟告成恩復元官撫按交薦不起

明史參新舊縣志

鄧鞅字文度本性蔡少育外家因氏焉為諸生時博綜經史負文望知縣楊子器以為絕倫嘗遣以俸錢又命巨室葺其廬

鞅咸謝不受正德丙子舉於鄉累上春官不第遂棄經生業闢一室於母寢之右以圖籍自娛尤好宋儒書每旦必肅衣冠焚香盥手而後讀之為文有體要歸有光陸粲皆稱之撫按重其品即其家建尚志坊嘗做呂成公大事記論次古今未得失類成卷帙曰如有用我執此以往年八十八卒子廷薦字臺山詩宗王孟畫亦工密

先賢事略列朝詩集新舊志合纂

曹達字履中嘉靖己丑進士為御史糾冢宰汪紘不法語峻甚上杖之五十謫外亦緹緘達得隨州判官州暴水達立賞格杆禦全活亡算攝斬水縣事中人從章聖梓宮過急責供帳達飭吏民手版水次已公服前引中人聞之曰是故強項曹

耶引去先是達按司隸有林甲者游權貴間賅敗致獄與主  
翟乙為營救併置法京師日儼號強項曹故云康熙志

錢學字汝明正德丙子舉人嘉靖十二年知烏程縣勵精教養

百廢俱舉陞刑部主事浙江通志

周鳴鳳正德間為桂東令興學勸俗抑暴鋤強吏民畏服湖南通志

朱木字大用一四字据選字子喬由舉人除山東樂昌縣擢南

臺御史執政逐不已附者遷治廷杖幾斃出判鄭州會浙中

繕兵部使者檄之行遷知遂安縣歲祲民阻山發礦格殺官

捕勢張甚將蔓部使者檄木勦平之木感然引兵駐山遣人

論以禍福羣盜於嶺上望見木羅拜大呼曰仁侯有令吾屬

敢不服從立解散去浙江通志案選舉志木嘉靖甲辰選

又選舉志作敘州同知當

章榮字宗肅由舉人知安吉州歲旱民飢殫力賑救其民好訟

恆以理解之有匿稅者為案籍人人閱之輒朴不用逋負悉

出嘗歎曰此豈古頭會法也吾以救弊而已州所治孝豐迄

榮去一無所擾遷永州府同知浙江通志

周懋字光政三字据選嘉靖六年由進士令定海進父老於庭

問所欲惡而興罷之邑故業海販時海寇肆暴官為厲禁且

刺歲比不登民胥嗷嗷懋曰茲民之所以為空也弛其禁徵科

則置厥縣庭坐區長其中令民赴納鄉無催科官無督責而

侵漁斂迹 浙江通志

陳欽字維鉉嘉靖八年進士 九字據選舉志補 為龍游令 案選舉主作工部志事

有治聲以罪謫光州添注同知為省中決疑獄數十條當

道以文行第一薦之會上南巡有司規避不肯往欽毅然請

行協濟新野行宮督造如制上駐蹕忻然欲大用之佞臣某

求賄不聽乃誣以他事遂落職母病不能還留寓光州卜居

於郝司馬故宅局戶謝客以琴書自娛一日沐浴北向再拜

默坐而逝 浙江通志

錢璠字國用 三字據選舉志補 嘉靖十二年由舉人令奉化減四明驛

借支水馬銀三百餘兩革象山縣借撥弓兵六十七名又侃

家硯地壞捐俸修之 浙江通志 遷雲南通判

顧玉柱字臺卿嘉靖壬辰進士由南京工部主事改北進郎中

外艱服除補刑部值春祈穀坐失陪祀謫道州同知有異績

遷平陽府通判尋陞代州知州歷河間府同知擢大名知府

遷山西副使庚戌秋俺答入塞玉柱適以慶賀入都被命監

軍時變起倉猝士伍搶攘玉柱躍馬馳塵埃中忽得頭暈疾

會嚴嵩亦以他事嫌之遂致仕性故伉直喜任事知常熟沈

弘彝以邑產沃瘠不同嘗計畝定稅三則其豪長者不無詭

匿玉柱議更度田攤稅乃躬行阡陌手操尺量而圖之雖民

譁議格然賴其首發奸弊匿田稍稍得清倭警首捐金助築

城役及倭薄城下堅守東南隅身冒矢石散粟予編伍佐知縣王鈇議守白茆三丈諸浦俱有策略居恆好談古節俠事

抵掌慷慨恨不一致身其間王志堅府志稿

盛賚汝字以善眉母王姓登嘉靖辛卯鄉薦任增城知縣增城陸接五嶺多寇盜水通海縮瓜哇三佛齊滿刺加諸國之利靈山諸峒蠻阻險竊出行劫賚汝廣設方略偵候精明賊不得出會督撫討羅山叛獠使賚汝監藍水軍劉智山者賊謀主也賚汝先擒斬之躬率營兵疾鬪而前追北數百里擄獲無算詔賜白金故事諸夷以寶貨至者監司命有司檢錄入其奇珍然後市易謂之抽盤賚汝三閱貨三卻之夷感其德

以驪珠象壺流離盃為壽又不受夷人益喜釀金樹楔署曰卻金督撫上其治行當內徵嚴世蕃索賂不得惡之會崖州知州葉某為政苛嬖生熟二種黎結連為寇朝廷不能討世蕃乃命吏部以賚汝知崖州至則移書屬邑結伍保收散亡稍稍復業黎歲當輸寶布粟米一切以權宜罷之惟嚴守備禁鹽不得闖出與黎市而已黎民既不奉吏法其首號土舍者不能統治爭田畜相仇殺賚汝遣譯諭降其土舍用其故俗使殺人者出耕牛為償犖犬臨水厓斬頭噫血相誓解仇既詛盟土舍還報黎人大喜輸租纏屬旬日致數千石生黎活羅本萬等聞其威信願歲輸貢比熟黎劇賊陳廷魁阻險

出掠賚汝授策巡撫袁士奇誘斬之海南兵備王惠急責沈水香賚汝拒之曰前州守以徵香木絀禍於黎至今未弭下吏若私銖兩及以賂上官者有如大海稍遷開封同知周府儀賓與倡狎復有私倡者憤而殺之藩府行金歸獄於倡家婢李梅花數年不決賚汝一讞得實黃河暴溢築隄三百餘里捍之擢漢陽知府瀕水填淤梗行賚汝出府羨金疏鑿溉田千餘頃名曰盛公河劉公洲賊千人阻江為寇賚汝督兵擣其巢俘斬賊首科臣張崇倫受賊賂屬勿窮竟賚汝答曰天子任公言天下是非不任公為逋逃主也竟為崇倫誣劾免官家居貧困以卒

先賢事略 乾隆志曰舊府志有許河字水東與賚汝同舉於鄉知浦江上蔡

兩縣創築石城祠名宦以無事蹟附見於此

陳如綸字德宣嘉靖間福建參議通敏有才時有陳龍圖之號

聽訟有關倫理者使謹實鄉老誨諭之動其良心皆涕泣罷

去主計者以如綸催科緩逮其家屬如綸出僕就繫民德如

綸聞而爭輸轉為諸邑最擢刑部主事

福建通志

錢泮字鳴教嘉靖十四年進士知侯官縣調繁慈谿擢刑部主

事歷員外郎郎中出知順慶府遷陝西副使備兵漢中嘗發

粟賑饑全活甚衆後陞江西參政丁父憂既歸而倭亂作邑

令王鈇善騎射時時從泮把酒談兵泮有兩蒼頭亦善射倭

自吳門劫關稅巨萬奪民船載之將由尚湖還海泮與鈇率

兵追至讓塘猝與倭戰伏四起鈇陷淖噴目大呼腹中刃死

泮被三槍殺三賊而死事聞詔贈泮光祿卿論祭建祠陰一

子錦衣百戶世襲明史舊志合纂乾隆志曰錢志時有徐

大王法智等斬獲甚眾王錢之難察拒賊三丈浦生擒韓龍二

趙士端字叔正以歲貢生授仙居訓導倭寇仙居令被害知士

端為學博將釋之士端曠目大罵倭斷其首止以身歸葬錢志

顧坤別號心田母病割左臂肉作羹以進母愈又二十年母卒

廬墓三年嘉靖間詔旌其門龔立本日有明邑人之以

嚴訥字敏卿嘉靖二十年進士改庶吉士授編修遷侍讀三吳

數中倭患歲復大祲民死徙幾半有司微斂益急訥疏陳民

困請蠲貸帝得疏感動報如其請尋與李春芳入直西苑撰

青詞超授翰林學士厯太常少卿禮部左右侍郎改吏部皆

兼學士仍直西苑所撰青詞皆稱旨禮部尚書郭朴遷吏部

遂以訥代之朴遭父喪復代為吏部尚書嚴嵩當國吏道汗

雜嵩敗朴典銓猶未能盡變訥雅意自飭徐階亦推心任之

訥乃與朝士約有事白於朝房毋謁私邸慎擇曹郎務抑奔

競振淹滯又以資格太拘人才不能盡倣先朝三途並用法

州縣吏政績異者破格超擢銓政一新尋錄供奉勞加太子

太保四十四年袁煒罷命兼武英殿大學士入參機務代者

郭朴未至仍掌銓政帝齋居西苑侍臣直廬皆在苑中訥晨

出理部事暮宿直廬供奉青詞小心謹畏至成疾久不愈其  
 年冬十一月遂乞歸踰年世宗崩遂不復出訥既歸里父母  
 皆在晨夕潔餐孝養人以爲榮訥嘗語人曰銓臣與輔臣必  
 同心乃有濟吾掌銓二年適華亭當國事無阻且所任選郎  
 賢舉無失人華亭謂徐階選郎則陸光祖也家居二十年卒  
 年七十有四贈少保諡文靖明史道隆陸慶丁卯舉人官中書舍  
 人操守甚峻澤字開宇太學生仕至  
 中書舍人爲人豪侈好義徵自有傳

瞿景淳字師道八歲能屬文从困諸生間教授里中自給嘉靖  
 二十三年舉會試第一殿試第二授編修鄭王厚烷以言事  
 廢徙鳳陽景淳奉敕封其子載堉爲世子攝國事世子內懼

贖重幣景淳卻之時恭順侯吳繼爵爲正使已受幣慙景淳  
 亦謝不納既而語景淳曰上遣使密詞狀微公吾幾中法滿  
 九載遷侍讀請急歸江南久苦倭總督胡宗憲師未捷景淳  
 還京謁大學士嚴嵩嵩語之曰倭旦夕且平胡總督才足辦  
 南中人短之何也景淳正色曰相公遙度之耳景淳自南來  
 目覩倭患胡君坐擁師十萬南中人不得安枕卧相公不欲  
 聞誰爲言者嵩愕然謝之歷侍讀學士掌院事改太常卿領  
 南京祭酒事就遷吏部右侍郎隆慶元年召爲禮部左侍郎  
 用總校永樂大典勞兼翰林院學士支二品俸侍經筵修嘉  
 靖實錄疾作累疏乞骸骨踰年卒贈禮部尚書諡文懿爲編

修時典制誥錦衣陸炳先後四妻欲封最後者屬景淳撰詞不可介嚴嵩為請亦不應橐金以投卒笑謝之子汝稷汝說汝稷字元立好學工屬文以蔭補官三遷刑部主事扶溝知縣扶宗人神宗令予重比汝稷曰是微服至邑庭官自扶扶溝民耳讞上竟得釋歷黃州知府徙邵武再守辰州永順土司彭元錦助其弟保靖土司象坤與西陽冉御龍相仇殺汝稷馳檄元錦解兵去三土司皆安尋遷長蘆鹽運使以太僕少卿致仕尋卒

縣志汝稷性嗜宗門書撮其要旨為指月錄 汝說字星卿五歲而孤搆文成輒跪薦父木主前萬曆中舉進士官至湖廣提學僉事亦以剛正聞

王志堅稿汝說初為營繕主事都水員外郎工曹日與宦者相接而商賈緣為姦利

是時營辦百端汝說條理精密動引故事為據羣闕日爭於前終無所假借所省以億萬計又考百年間供億盈縮之數彙而成書至今賴之督學政時所進退士雖有勢如山不可撓 子式耜別有傳

明史

徐棡字世寅嘉靖丁未進士除宜春知縣擢南京御史時京山王宗茂者同被命瀕行嚴嵩置酒餞之備極珍異宗茂多不能名棡微笑曰海外物也若何由名後宗茂極論嵩父子其疏草嘗從棡更定有設宴而水陸畢具皆海外物等語嵩恨之謫棡浙江都事遷饒州同知擢浙江僉事進參議監戚繼光軍破江西羣盜丁內艱歸服闋補河南轉湖廣提學副使遷雲南參政進按察使轉山東布政使尋擢應天府尹赤上拜右副都御史巡撫江西疏言饒困於蠶其猩紅尤不易得

朝廷淺其色而減其數晉南京工部右侍郎山東漕河淤議

開海運棧被命督膠河工未竟

按明史劉應節傳王宗沐建

議海運應節與工部侍郎徐

議鑿山引泉計費百萬議者爭駁之召棧還罷其役 改兵

部右侍郎巡撫浙江修築海鹽隄二十餘里入為刑部左侍

郎拜南京工部尚書時張居正以奪情怒言者棧以書規之

未幾罷歸棧歎歷中外為政務捍禦災患師事嚴訥其恭謹

頗相類 龔錢二志合纂

錢之選字舜臣父表以事繫獄之選日走控上官莫能解乃代

父繫獄父遠愬京師母卒於家泣懇差押視含殮夜復就繫

居囹圄手一編呶唔不輟父歸出獄則又躬樵採以供父朝

夕迨父戍遼東之選隨往有千戶延為師遂補鐵嶺衛諸生

嘉靖庚戌成進士授晉江知縣以搏擊為治為巨姓所齟調

固始縣遷刑部主事改兵部進郎中上書訟父冤得雪封父

如其官遂告終養父子衣繡還鄉吳中傳為佳話其閑家甚

苛官刑部時視獄未歸妻妾在邸值風烈損封識妻妾同侍

婢皆惶懼自縊後御姬媵益苛重足屏立多不良死鄉邦忿

之然孝行甚高自不相掩

王志堅府志稿

錢有威字惟重後遷長洲為諸生時其制舉義即為同儕所誦

習嘉靖庚戌成進士授行人陞刑部主事裕邸有閹奴犯法

大璫李素懷以私憾縛閹屬有威窮治時景王未之國中

危疑有威謂奴罪不及主必引繩批根浸淫及裕邸爲不便  
乃抵奴罪實闔不問素懷恚甚構蜚語中傷謫德州判官遷  
登州通判攝府事文登巨豪相聚竊礦縣官不能制遽以反  
告有威曰何事張皇亟草檄諭渠魁自縛詣吏餘悉貫不問  
豪黨賂所親求解不得忌者遂以是誣有威時已遷南京刑  
部郎中猶中以考功法罷有威坦衷熱腸遇人有急嘗傾身  
爲地入仕籍十九年囊無餘蓄年八十四無疾而終

申時行  
墓誌參

縣志

劉泉字漸甫嘉靖三十年任嚴州府推官闔郡豪右無不斂跡  
署淳安風清弊絕凡以人命訐訟或服藥縊死圖詐者鞠治

之才風始息

浙江  
通志

邵圭潔字伯如世居虞山北麓學者稱北虞先生瞿景淳嚴訥  
輩結社會文時稱十傑圭潔爲領袖孫樓其高弟也工制舉  
業策論尤攻練詩文不斤斤繩削而清婉凄切參軌名家嘉  
靖己酉舉於鄉五上公車不第選德清教諭卒爲人篤行孝  
弟留心經濟倭亂邑令王鈇造廬問計上築城四策城賴以  
全子鏊字麟武萬曆丙戌進士仕至兵部郎中

龔錢一  
志合纂

孫樓字子虛舟孫嘉靖丙午舉人選湖州府推官有文學爲吏  
非其好也然公廉嘗攝郡政捕論璫墮村巨盜一郡帖服改  
漢中遂致仕歸性好書杜門較讎晝夜不輟所藏踰萬卷略

無脫訛燕集諧諱四座盡傾或以滑稽寓之文章為古文詞法歐蘇而不竟其才

龔志

陸一鳳字子韶潤曾孫嘉靖壬子舉人授泉州府同知泉故瀕海歲屢中倭一鳳簡勁卒為水寨戍之以燧燿翼其外既而他海舟皆以颶敗而一鳳所部獨全尋偕諸將討海寇林鳳大破之覆其巢詔賜白金一鎰凡三署府篆四攝縣事以至清戎籍理屯政課鹽法俱能舉職以勞瘁卒於官孫崇禮萬曆戊戌進士平陽知縣問禮字衷虛萬曆甲辰進士南贛巡撫

管錢二志  
撫通志合纂

陳瓚字廷裸嘉靖三十五年進士授江西永豐知縣治最擢刑

科給事中劾罷嚴嵩黨祭酒王才諭德唐汝楫遷左給事中劾文選郎南軒請錄建言廢斥者帝震怒杖六十除名隆慶元年起官吏科請卹楊最楊爵羅洪先楊繼盛而誅奸黨之殺沈鍊者帝可之楊順路楷皆逮治其冬擢太常少卿初徐階當國雅重瓚時與密議瓚亦侃侃自將既而高拱與階相構喉御史齊康劾階瓚與諸言官交論之康坐黜拱亦去位三年冬拱再入瓚已移疾歸竟坐浮躁謫洛川丞不赴萬曆初張居正柄政又以瓚前論止大閱有侵居正語亦惡之不召居正死始以薦起會稽縣丞五遷復故官再遷左副都御史會大計羣吏瓚堅執可否當事者畏之踰月進刑部右侍

郎尋轉左時稽勳郎顧憲臣以疏論時弊謫官瓚責大學士  
王錫爵曰憲臣疏最公何以得譴錫爵曰彼執書生之言徇  
道路之口安知吾輩苦心瓚曰恐書生之言當信道旁之口  
當察憲臣苦心亦不可不知也錫爵默然瓚前後忤執政如  
此未幾卒官贈右都御史諡莊靖

明史參  
縣志

王嘉言字君謨嘉靖壬戌進士授肥鄉知縣一夕斃三猾胥解  
散鹽盜洗手奉職踰年大治外艱服闋再補曲周擢工部主  
事改南禮部歷郎中擢浙江僉事備兵寧紹台儲糗糧練士  
卒烏倭突入嘉言縛其魁六人斬首三十餘級詔賜白金一  
鎰遷參議移駐溫處處多礦盜嘉言撫諭悉散去再賜金幣

引疾歸

錢志

錢順德字道充舉嘉靖乙丑會試隆慶戊辰釋褐授刑部主事  
歷郎中初徐階論死都御史楊順御史路楷天下稱快高拱  
再起欲釋此兩人順德白尚書毋署名牘尾尚書慚恚屬他  
郎出知常德府平徭賑饑流民復集母喪歸補知興化府歲  
早禱於蟹眼泉應時得雨遷浙江副使調山東致仕兄順時  
字道隆嘉靖己未進士奉命餉遼軍給假歸卒年甫二十九  
順時倜儻有大志講求天文律曆河渠兵農諸家之學旁獵  
醫卜方技無不該洽子世揚字景行年十三能闇記經史數

萬言

錢志

何鈞字子宣才識通敏好談經世大略嘉靖乙卯舉於鄉除浙江平陽知縣平陽有東西江灌田四十萬畝而海水流注田為斥鹵鈞修築鳳浦埭以捍之歲輸永嘉蒲門軍糧涉江踰阻民苦其勞鈞請折銀皆垂永利又行視甌江防倭要害築石堡二為營房百二十以居戍卒繕置守備縣境帖然歷官淮府長史致仕尚寶司卿徐貞明開畿南水田貽書詢鈞報言國家兵屯鹽漕四政皆表裏水田田邊地之法四曰清舊屯重邊引廣招募隆賞功田內地之法三曰貴力田更納贖準徭役定流配田畿南之法三曰近山用閩人汲泉法近河用楚人障陂法近海用吳人引潮法鑿鑿數萬言皆可施行

會尚寶議格而止

錢謙益志

韋煥字思聚

三字据選舉補

嘉靖間仙游教諭捐俸修樂器祭器重修

文廟及明倫堂門廡齋舍

福建通志

章宗實嘉靖間知歸化縣性清介人不敢干以私廣寇犯境宗

實率僚屬多方守禦復捐築四門月城民賴以安

福建通志

宗禮世官應天衛千戶歷署都督僉事驍勇敢戰嘉靖間以倭

亂調援浙西遇賊帥徐海於阜林三戰三捷以九百騎破其

萬眾海辟易稱為神兵論者謂軍興以來血戰功第一竟沒

於陣詔贈都督同知諡忠壯賜祠阜林

通志明史附見胡宗憲傳

譚照字儒溪增例太學生與弟太學生曉字鏡川三世同居嘉

靖三十一年島倭入寇時邑皆土垣知縣王鈇議築城費無所出照慨然倡義捐貲四萬餘金親身督率晝夜併力不五月而城工告竣甫三日倭猝至民憑堅城保守邑以無虞吳又連遭水旱照散米賑飢全活無算又自東門至崑山界備築岸塍十萬餘丈建石橋十八座以便往來撫按題請表揚時曉已卒照念祖父以來三世未分所捐之金與弟共之因推功於弟曉得建專祠隆慶元年照卒撫按又核其事行具題備主入曉祠一體致祭

通志

林德父為倭所殺詞知讎所在委身從之屈意善事既親暱乃具酒食誘倭醉卧取其佩刀斷首以歸

通志

周伯字懷堂質直好義嘉靖間倭犯海上令大戶築城伯獨任

鎮海門一帶寇至伯率家屬拒之獲三甲首辛酉大水輸粟

千鍾粥餓者楷溝齒御史旌其門曰忠義

通志

蔣以忠字伯孝隆慶戊辰進士授長樂知縣政尙廉靖邑有濱

閭二湖灌田千頃為豪猾竊據以忠執下於理大加疏濬民

賴其利陞南京刑部主事有聞偽稱選良家子充後宮部使

者覺而執之聞託權貴關說以忠不為動竟論死進郎中外

艱歸服除再補刑部有尙書子使酒殺人以忠不阿亦論死

遷廣平知府廣平高阜苦旱民飢為盜以忠建閘置倉經理

荒政盜為衰止遷福建副使未上卒以忠居官廉介內行修

潔有文名

管志

蔣以化萬曆間知孝感縣常巡行郭外召父老問民疾苦給牛

種歲稔躬為糜粥舖之

湖北通志

趙用賢字汝師父承謙廣東參議

縣志承謙字德光釋褐贛州推官擢南吏部主事晉郎中

遷參議為人魁岸倜儻不可說以非義當銓考滿時嚴世蕃聞其名使索數百金為贖曰君良苦不當為南官我能為地承謙笑應曰犬馬齒長不任公事且安所得金竟謝去

用賢舉隆慶五年進士選庶吉士萬曆初授檢討張居正父喪奪情用賢抗疏曰臣竊怪居

正能以君臣之義效忠於數年不能以父子之情稍盡於一

日臣又竊怪居正之勳望積以數年而陛下忽敗之一旦莫

若如先朝楊溥李賢故事聽其暫還守制刻期赴闕庶父子

音容乖隔阻絕於十有九年者得稍伸其痛於臨穴憑棺之

一慟也國家設臺諫以司法紀任糾繩乃今嗶嗶為輔臣請

留背公議而徇私情蔑至性而創異論臣愚竊懼士氣之日

靡國是之日淆也疏入杖六十除名用賢體素肥肉潰落如

掌其妻腊而藏之用賢有女許御史吳之彥子鎮之彥懼及

深結居正得巡撫福建過里門不為用賢禮且坐鎮於其弟

下曰婢子也以激用賢用賢怒已察知其受居正黨王篆指

遂反幣告絕之彥大喜居正死之明年用賢復故官進右贊

善江東之李植輩爭嚮之物望皆屬焉而用賢性剛負氣傲

物數訾議大臣得失申時行許國等忌之會植東之攻時行

國遂力詆植東之而陰斥用賢謂昔之專恣在權貴今乃在下僚昔顛倒是非在小人今乃在君子意氣感激偶成一二事遂自負不世之節號召浮薄喜事之人黨同伐異罔上行私其風不可長於是用賢抗辨求去極言朋黨之說小人以之去君子空人國詞甚激憤帝不聽其去黨論之興遂自此始尋充經筵講官再遷右庶子改南京祭酒請建儲宥言官李沂罪居三年擢南京禮部右侍郎以吏部郎中趙南星薦改北部尋以本官兼教習庶吉士二十一年王錫爵復入內閣用賢以爭三王並封語侵錫爵爲所銜會改吏部左侍郎與文選郎顧憲成辨論人才羣情益附錫爵不便也用賢故

所絕婚吳之彥者錫爵里人時以僉事論罷使其子鎮許用賢論財逐壻蔑法棄倫用賢疏辯乞休遂免歸戶部郎中楊應宿鄭材復力詆用賢請據律行法都御史李世達侍郎李貞疏直用賢斥兩人讒詔遂爲所攻高攀龍吳弘濟譚一召孫繼有安希范輩皆坐論救視職自是朋黨論益熾言事者益裁量執政執政日與杖拄水火薄射訖於明亡云用賢長身聳肩議論風發有經濟大略蘇松嘉湖諸府財賦敵天下半民生坐困用賢官庶子時與進士袁黃商榷數十晝夜條十四事上之時行錫爵以爲吳人不當言吳事調旨切責寢不行家居四年卒天啟初贈太子少保禮部尙書諡文毅

縣志

子琦美字元度以蔭至刑部郎中博聞強記隆美字文度由刑部郎中出知敘州府嘗遣兵大破奢崇明奢安二酋士春士錦皆其子也孫士春士錦崇禎十年同舉進士士春字景之第三

人及第授編修明年兵部尚書楊嗣昌奪情視事未幾入閣少詹事黃道周劾之下獄士春上疏曰嗣昌墨綬視事既已罔效陛下簡入綸扉自應力辭新命乃閱其奏牘徒計歲月久近間絕無哀痛惻怛之念何奸悖一至此也陛下破格奪情曰人才不足故耳不知人才所以不振正由愛功名薄忠孝致之且無事不講儲才有事輕言破格非用人無弊之道也臣祖用賢首論故相奪情幾斃杖下腊敗肉示子孫臣敢背家學負明主坐視綱常掃地哉帝怒謫廣東布政司照磨

祖孫並以攻執政奪情斥士論重之後復故官終左中允明史

沈應科字獻夫隆慶辛未進士由沂州知州累陞廣西左參政

致仕應科服官廉潔所至於民有德在沂州當凶饑後招集

流民五千餘家時賦均徭鄰壤取法巡撫李世達於屬吏中

獨賢應科其蠲積逋折馬價著為令多自應科條上費縣典

史以賅聞應科廉知其枉言之世達世達曰已注下考矣應

科曰吏有大小官評無大小也世達為揭吏部得免其相信

如此家居三十年闔門掃軌年八十六卒錢謙益墓表孫春澤字

雨若能詩善草書畫竹為吳下名士後移家白門交游翕集

嘗讀鍾惺詩集序而刻之病羸死列朝詩集

黃門字道登任閩縣知縣有清操政簡民安稱於時福建通志

儲國本字首卿少時有嫠婦窺而悅之私饋以金國本辭金徙

舍以絕之為諸生都講所得贄脩悉取以奉母每日必具甘

羹夜伺父母既寢乃入子舍母嘗苦痢味旦往禱於周孝子

廟門忽啟既卜得吉占從廟祝乞紫蘇少許以進母飲之病

良已其後母又病復禱於周神忽見神左目流淚疾果不起

其父歿未大殮天暴雨雨俗傳尸氣聞雷則腫國本跪中庭

泣請於天雷即無聲將葬身卧壙中以占燥溼廬墓終喪龔志

陳喆字成夫家貧無書嘗入書肆耽玩過目即記時跨黃犢牧

於田間挾書以讀治春秋學折衷諸家之說而彙集之名曰

集解

康熙志

唐一麟字少峰天恩曾孫母病殆一麟日夕焚香請代一夕大

笑數聲而卒二三日而母病愈康熙志

黃時雨字化之萬曆甲戌進士除刑部主事遷郎中當張居正

一切繩下時雨獨持平出為惠州知府履畝清釐田賦免鐵

稅八百餘兩禁女子市易御史王度死靖難子孫成廣奏脫

之岑岡夷長江月照者故涖寇李文彪黨也初王守仁破池

仲容時岑岡獨嶮遠不可下文彪死月照代有其眾公行劫

掠督撫遣兩指揮使招之月照答之百貫其耳使復命督撫

怒命副總兵率師勦之時雨移牒陳不可願假歲月斬賊督

撫許之乃為手書令主簿邱懋入其巢隙禍福月照謾言抵  
 攔時岑岡私人徧左右伺官府動息時雨廉得四人令取賊  
 自贖以方寸紙用府印書免死字使持歸賊巢給降者署名  
 為信得三千餘人月照弗覺也既遣邱懋歸椎牛鳴鼓聚眾  
 如平時無應者再鼓如前月照計窮乃挺身詣府及城闔服  
 毒死斬首以獻散其黨為良民寇始絕擢廣東副使再平海  
 寇李茂陳德樂之亂遷雲南參政乞歸養卒時雨天性卞直  
 與人言蟬連不出口遇事明辨莫能奪持身廉在粵十餘年  
 不能自潤云

先賢事略  
參錢志

陳國華字珍凡迨之孫萬曆甲戌進士授南刑部主事晉郎中

張居正柄政子懋修擢進士第一尙書吳某屬國華草賀啟  
 辭以不能為四六語聞居正降東平知州東平故土城部議  
 登石民苦之國華奏請第深大其塹擒劇盜黃旛數決疑獄  
 累遷廣州知府首行保甲連坐法市穀旁郡以濟旱飢政報  
 最會有蝥之者改調歸卒年九十子星樞字拱薇萬曆丁酉  
 舉人知湯陰縣告歸養親以孝聞

錢志參陳祖  
范昭文志

顧雲程字務遠萬曆丁丑進士初任淳安縣調繁嘉興擢御史  
 出為江西僉事歷霸州兵備至山東左布政整飭永平晉一  
 品服俸終南京太常寺卿雲程初涖淳安適歲凶撫按令禁  
 糴雲程曰遏糴非救荒策也但示販米者每十官買其一餘

勿問及在嘉興歲稔穀賤雲程故緩催科元旦問耆老曰穀價視冬若何曰石益一鑲矣雲程曰如是趣完賦五日而畢分巡九江時有景德鎮之亂藍芳威為渠帥巡撫欲用兵雲程議撫降之其後平哮平播芳威俱在行間為時名將在貴州安撫容山銅仁二苗在霸州稅使馬堂橫肆雲程繩之以法居永平八年嚴禁搗巢邊無烽警龔志

王之麟字汝禎萬曆丁丑進士授刑部主事晉郎中遷撫州知府內艱服闋補廣信府所在多惠政歷湖廣僉事山東參政歲大饑力請蠲賑益都知縣吳宗堯疏論礦稅貪暴被逮繫獄事下撫按會勘之麟第署宗堯不諳世故拙於保身士論

壯之中使嚴括庫藏東阿寧陽議以倉穀畀之之麟不可卒於官子宇春字季和讀書續言勇於為人顧大章被闖禍宇春冒暑求解傷暈道病卒錢志

陸枝字培吾世居畢澤萬曆丙子舉人知桐鄉縣廉平為天下最陞彝陵知州稅關將抵荆凡牙吏恣為奸利枝率州民追而沈之闈不敢問遷平樂府同知致仕歸以孝友為人矜式者二十年年八十三卒錢謙益誌

陸化淳字君復居五渠年十三縣令試化日中天論援筆立就萬曆壬辰登進士授工部主事治泉濟上身行淖泥中導流決塞諸泉悉理晉郎中出知金華府義烏東陽開採不聊化

淳邀礦使駐府授縣方略以得不償失報遂定全湖補價議  
革守礦兵省費以千數會義烏知縣忤司理誣縣不職上之  
巡按御史化淳力爭事得白御史入都列理刑罪狀奪其官  
化淳歎曰我不能借屬吏媚當道忍以同官徇屬吏哉遂乞  
歸以薦起知贛州府郡政久弛庫帑虛額至三萬化淳發奸  
弊復其額屯軍橫暴出納多不如法典司者往往破產議以  
本屯軍卽支本屯糧著爲例贛有四郵郵道自南安而下宜  
從水乘傳者利其折入舍水從陸化淳請令馳傳至南安卽  
止陸給其敏練如此竟以勤事卒官先是府通判以兩橋稅  
入羨金貯於府病革時以微言諷化淳曰無所藉此弟化熙

字子羽明萬曆癸丑進士授刑部主事晉工部郎中管器皿  
厰值光熹二宗婚喪相繼釐弊責實省金錢五萬督夏陽鎮  
河道開滿家壩漕艘得由湖入沔不經河險聞香賊起連陷  
鄒滕或勸移家赴臺莊化熙曰我奉命治河以護漕也我去  
而鎮事危矣鎮危漕安得獨完於是乞援兵塞隘口謹守望  
賊不敢逼淮徐兵至化熙遣淮兵營戚城徐兵營東關賊首  
劉翠華悉騎壓淮兵互有殺傷徐兵望而卻走賊遂突入東  
關化熙單騎抵徐益請兵授計陳百戶乘夜疾馳襲賊於朱  
公祠退保戚城會滕民擒翠華賊遂散化熙無疆守寄而禦  
捍之功甚偉遷湖廣副使備兵武漢黃歷廣西提學進湖廣

參政未赴卒

錢志

顧雲鳳萬曆間由進士知潼川州為政得大體凡民輸課令自

稱兌不多分毫郡當孔道應之整暇有術治潼七年民深愛

戴升刑部員外郎

四川通志

袁光宇字元讓萬曆丙戌進士令烏程歲早步禱為民請命稍

禮不忍以誅求困民上供不及額郡檄數下守催之吏日至

不為動主者怒其慢俸再奪處之怡然編審貧富以均漕兌

不增一粟軍民稱平陞工部主事

浙江通志

薛志學字海觀萬曆間天河知縣縣四堡皆沒於賊志學諭之

悉來歸治有政聲

通志

席允信字順懷萬曆間築福山城十之一雲和塘十之二解磚

解銅輓運漕糧每代鄉民償補缺額明季荒旱載粟數千斛

分貯城中半價糶以為賑在其鄉施粥成梁建牖諸便民事

無不為舉鄉飲賓

通志

吳正一字素風明季旱蝗催科愈急正一子身冒死叩闕陳四

載奇荒得旨許豆麥搭兌蘇松常鎮湖五府帶兌餘米捐十

之四

通志

翁憲祥字兆隆萬曆二十年進士為鄞縣知縣課最入為禮科

給事中以憂去補吏科疏陳銓政五事其一論掣籤法言使

盡付之無心則天官之職一吏可代苟為不然則地本預擬

何必於大廷中為掩飾之術請亟停罷時不能從故事正郎不奉使撫按必俟代至是多反之而江西巡撫許弘綱以父憂徑歸廣西巡撫楊芳亦以憂乞免代憲祥極言非制弘綱貶官芳亦被責言者詆朱廣李廷機輒被譴憲祥疏論已劾雲南巡撫陳用賓兩廣總督戴燿並不報是時大僚多缺憲祥言九卿俱曠甚傷國體因陳補缺官起遺佚數事報聞屢遷刑科都給事中吏部尚書孫丕揚副都御史許弘綱以考察為言路所攻求去憲祥言一時賢者直道難容相率引避國是如此可為寒心既而軍政拾遺疏為錦衣都督王之楨所撓久不下罪人陳用賓等已論死疏亦留中憲祥皆抗章

論駁知縣滿朝薦李嗣善同知王邦才以忤稅使繫獄力請釋之會冬至停決囚復請推緩刑德意宥屢臣矜楚獄帝皆不報尋調吏科四十一年命輔臣葉向高典會試給事中曾六德以論救被察官坐貶旨皆從內出憲祥力諫中官黃勳趙祿李朝用胡濱等不法亦連疏彈劾久之擢太常少卿居數年卒

明史 縣志 憲祥弟 愈祥字兆和 萬曆戊戌進士 授 鄒平知縣 人以少年易之 愈祥發摘如神 調知會稽 丁艱 補清豐 召為稽勳 郎中 卒於道 愈祥通籍 數年 蕭然 四壁 嘗署其門 曰 苞苴未許 誰人到 清節 惟應比戶知

嚴澂字道徹 訥次子 清修 雅尚 以蔭仕 至邵武知府 按獄窮其

指蹤者 治稅去其煩苛者 闔為稅使 縱橫澂收其檄 闔奪氣 去築東壩 開鷺絲池 通九曲水 舉一切利民事 歸里後 琴書

自娛湘簾棊几陳列古器座無俗賓口無俗語他如娶啞女  
卻治童歸姻某產鉅萬皆人所難能者錢志

陳禹謨字錫元瓚子萬曆辛卯舉人授獲嘉教諭累陞兵部郎  
中遷四川僉事備兵川南長琪盜起夷亦煽動禹謨擒斬其  
豪移檄諭降涼山夷石波等萬餘人尋遷貴州參議分巡清  
都撫臣議勦下衛苗禹謨偵知平定諸夷為之謀主誘斬之  
遂分兵拔其寨寨凡二十一其一曰馬蹏寨有洞險阻賊所  
窟穴用火攻殲焉疊石封戶鑿其石曰天焦紀功而還振旅  
入賀病卒於途贈亞中大夫禹謨記問該博嘗撰左氏兵略  
以左為經諸史為緯上於朝錢志

管一德字士恆孤苦力學有聞於時萬曆辛卯舉鄉試第二中

丞顧益卿家居與一德談禦倭方略一德謂今國家之患恐

不在倭河道尚書楊後山與談治河一德謂古來治河無百

年之計而持文墨議論者往往計成敗於歲月今明公雖有

端緒第恐數年間河徙不常而議論者復持其後矣屢上春

官不第退而修常熟文獻志凡四年而成錢志

顧雲鴻字朗仲中萬曆庚子鄉試年甫強仕而卒雲鴻少喪父

拊心嘔血終身抱怔忡之疾事後母至孝雲鴻病後母籲天

請代後雲鴻死旬月以哀卒後母之殉其子古未有也讀書

虞山之藤溪博學深思研精六籍句字少有抵牾穿穴古今

訓故證明而後已生平耿介絕俗而急公赴義不顧頭目以忠孝名節為己任丁未鎖院對策至天災民窮淚霰霰下沾漬楮筆嘗語所知大丈夫殺身取義當轟轟烈烈如疾雷閃電公等暖妹自好他日縱遇難死節不過作文文山謝疊山耳江陰繆昌期長洲文震孟皆嚴事之曰朗仲吾師也學者私謚孝毅先生同時邵濂字茂齊治毛詩為大師善談名理吳越間學者宗之累舉不第病消渴死錢謙益吳中名賢表楊續議參列朝詩集

徐待聘字廷珍棧從孫萬曆辛丑進士歷知樂清上虞分宜三縣皆有遺愛陞刑部主事轉工部郎中管節慎庫勾稽出入洗手奉職遷湖廣僉事分守荆南當奢酋驛騷繕兵庀餉荆

南晏然陞陝西按察使巡撫喬應甲希魏忠賢意追故侍郎王之案賍期旦夕辦待聘故緩其獄與應甲抗不少屈尋引疾歸從弟待任字廷葵萬曆丙午舉人知沔陽州楚藩中涓殺人捕置諸法相國子奪民田視其質剗斷歸民會待調分守荆南未及調卒曾志

朱奎光字培巖萬曆壬子舉人能詩古文辭工書法嗜酒善談謔所至傾其座客謁選授廣東龍川縣轉浙江寧海縣俱以廉謹稱方正學為寧海人革除時邑人株連被戮者眾銜之刺骨奎光修邑志首增入之又立祠以表忠節康熙志

顧大章字伯欽雲程子與弟大韶孿生舉萬曆三十五年進士

授泉州推官乞改常州教授父喪除值朝中朋黨角立正士  
日摧大章慨然曰昔賈彪不入顧厨之日卒西行以解其難  
余向與東林疏可以彪自况也乃入都補國子博士與朝士  
通往來陰察其交關肯繁清流賴之稍遷刑部主事天啟改  
元進員外郎尚書王紀令署山東司事司轄輦轂最難任自  
遼陽失五城及京營巡捕日以選奸細爲事稍有踪迹率論  
死絕無左驗者二百餘人所司莫敢讞多徙官去囚未死者  
僅四之一大章言於紀曰以一身易五十人命且甘之矧一  
官乎即日會讞繫二人餘悉移大理釋放紀大嗟服佟卜年  
之獄紀用大章言擬流卜年未上而紀斥侍郎楊東明署事

欲寘之大辟大章力爭卒擬流忤旨詰責竟論卜年辟瘐死

獄中魏忠賢欲借劉一嘯株累劉一燝大章力辨其非忠賢

大恨

卜年一嘯事具明史  
王紀劉一燝傳中

熊廷弼王化貞之下吏也法司諸

屬二十八人其讞多有議寬廷弼者大章因援議能議勞例  
言化貞宜誅廷弼宜論戍然二人卒坐死大章亦遷兵部去  
無異議也會王紀劾罷徐大化又疏刺客氏其黨疑紀疏出  
大章手恨之大化令所親御史楊維垣訐大章妄倡八議鬻  
大獄大章疏辨維垣四疏力攻言納廷弼賄四萬且列其鬻  
獄數事反覆詆訐不休大章危甚賴座主葉向高保持之下  
所司驗問都御史孫瑋等白其誣帝以大章瀆辨稍奪其俸

大章遂引歸五年起官歷禮部郎中陝西副使大化已起大理丞與維垣為忠賢鷹犬因假汪文言獄連及大章逮下鎮撫拷掠坐贓四萬及楊連等五人既死羣小聚謀謂諸人潛斃於獄無以厭人心宜付法司定罪明詔天下乃移大章刑部獄由是漣等慘死狀外人始聞比對簿大章詞氣不撓刑部尚書李養正等一如鎮撫原詞以移宮事牽合封疆坐六人六辟爰書既上忠賢大喜矯詔布告四方仍移大章鎮撫大章慨然曰吾安可再入此獄呼酒與大韶訣趣和藥飲之不死投繯而卒崇禎初贈太僕卿官其一子福王時追諡裕愍初大章等被逮秘獄中忽生黃芝光彩遠映及六人畢入

適成六瓣或以為祥大章歎曰芝瑞物也而辱於此吾輩其有幸乎已而果然大韶字仲恭老於諸生通經史百家及內典於詩禮儀禮周官多所發明他辨駁者復數萬言嘗以為宋元以來述者之事備學者但當誦而不述將死始繕所箋

詩禮莊子曰炳燭齋隨筆云

明史列朝詩集曰大章從父弟大武字武仲權奇倜儻以古

豪傑自命天啟中大章被急徵大武傾身入長安職內囊體一夕垣中白氣亘北斗大武故諳曉星象指而泣曰諸君子其不免乎已而楊左六公并命大武護大章喪歸益自放於酒未幾歿又黃宗義顧玉書墓誌曰玉書名麟生大章子志氣豪邁好讀書年十五大章遭奄禍及烈廟昭雪死事而大章以封疆一案為逆黨把持止於贈官麟生赴闕頌免帝詔法司改定爰書周延儒之再相也錢謙益致書勸其起用馮銓麟生知其事而洩之於人謙益大恨欲寘之死因徙居吳門詩文有進履齋草

陳必謙字益吾曾祖交字汝同有至行由舉人官興寧知縣著廉聲必謙登萬曆癸丑進士知輝縣濬阜水萬泉等河民利賴之擢南御史抗疏論挺擊紅丸二案罪人當窮治削籍歸崇禎初起故官極論奄黨諸奸罪又陳京察當行六事曰正紀綱明職業重操守破情面禁借端息黨議累擢都御史巡撫河南時汴宋汝雒間所在皆寇必謙所部兵不滿千人援勦邊兵多駐洛西必謙亟檄令主客兵分道殺賊邊將左良玉部將李雲程趙柱累戰皆捷部將陳永福自陳趨沈邱攻破賊賊分走潁鞏洛必謙曰濠潁接壤園陵不可再驚而西賊又不容緩圖乃自引兵而西命陳永福率兵赴潁力戰賊

走黃州西賊亦奔洛西永寧靈寶告急必謙遣別將救永寧而自救靈寶賊依朱陽山而陣師薄之賊潰走尸填川谷別將亦敗賊於河底村已而賊帥號闖王者擁衆出關合數部寇雒陽必謙督邊將左良玉祖寬等戰於九皋山又大戰汝州圯料鎮斬賊帥闖場天整齊王賊潰走或西入秦或南入楚而闖賊由汝竄入南直界必謙上疏請專勦闖賊餘黨當自定方議進兵會賊別部復自秦楚分道向雒闖賊乃復進窺歸德開封必謙督諸將迎擊敗之度闖必西分兵備汝雒賊果西諸將前後夾擊又破之會楚鄭二撫不能同心而京師戒嚴邊帥在河南者皆召入衛賊勢復猖必謙轉戰宛雒

界上斬賊掃地王擒偽軍師金龍騰甚著勞績執政忌其功遂以誤撫墮計土寇不戢二事為罪解任歸必謙歸而河南不可為矣初帝嘗書天下清官四人於御屏首文震孟次即必謙次劉宗周次黃道周久之召為工部侍郎晉尚書未幾有甲申三月之難必謙被執得聞亡歸發憤病死錢志

魏浣初字仲雪萬曆丙辰進士改嘉興府教授集諸生講論如家塾之課子弟遷南京戶部主事晉吏部郎中陞廣東僉事分巡嶺南擒巨盜李魁奇鍾國讓等尋陞參政提學廣東公慎明允文有未善每召諸生面為指授卒於官為人清隘自好喜為詩得元白意弟冲字叔子崇禎庚午舉人與兄

一時名士多從之游詩亦倣元白體錢志

孫朝肅字恭甫萬曆丙辰進士授刑部主事光宗不豫李可灼進紅丸朝肅上書大學士方從哲責其不清宮闈隱蠹調養聖躬有負先帝之託其後諸臣拉疏排擊實自朝肅發之出知兗州府會白蓮賊亂單騎赴任縋入城鼓勵士民悉力戰守賊平陞廣東副使遷布政使失巡撫意鐫級歸弟朝讓字光甫崇禎辛未進士由刑部員外出為泉州知府內艱服闋復補泉州人歡呼如父母再至陞建南道副使尋進按察使陞江西布政使未赴而明亡時年未五十優游林泉四十餘年詩文多發天然草書法孫過庭年九十而終錢志參昭文志

瞿式耜字起田汝說子舉萬曆四十四年進士授吉安永豐知縣有惠政天啟元年調江陵永豐民乞留命再任以憂歸崇禎元年擢戶科給事中疏言李國楷宜留內閣王永光宜典銓曹于汴宜秉憲鄭三俊畢懋良宜總版曹李邦華宜主戎政帝多採其言俄陳朝政不平爲王之宋請卹孫慎行訟免速楊鎬王化貞之誅白楊漣左光斗結毒之謗追論故相魏廣微顧秉謙馮銓黃立極之罪因言奪情建祠之朱童蒙不可寬積愆久廢之湯賓尹不可用帝亦納之又極論來宗道楊景辰附逆不可居政府二人旋罷去御史袁弘勛劾大學士劉鴻訓逆黨徐大化實主之川貴總督張鶴鳴先已被廢

其復用由魏忠賢式耜並疏論已頌楊漣魏大中周順昌爲清中之清忠中之忠三人遂賜諡未幾陳時務七事言起廢不可不覈陞遷不可不漸會推不可不慎諡典宜嚴刑章宜飭論人宜審附璫者宜區分又極論館選奔競之弊請臨軒親試事多議行時將定逆案請盡發紅本定其情罪輕重又言宣府巡撫徐良彥不附逆奄爲崔呈秀誣劾遣戍亟當登用良彥遂獲起式耜矯矯立名所建白多當帝意然搏擊權豪大臣多畏其口十月詔會推閣臣禮部侍郎錢謙益以同官周延儒方言事蒙眷慮並推則已絀謀沮之式耜謙益門人也言於當事者擯延儒弗推而列謙益第二溫體仁遂發

難延儒助之謙益奪官閑住式耜坐貶謫式耜嘗頌貴寧參政胡平表殺賊功請優擢其後平表爲貴州布政使坐不謹罷式耜再貶二秩遂廢於家久之常熟奸民張漢儒希體仁旨訐謙益式耜貪肆不法體仁主之下法司逮治巡撫張國維巡按路振飛交章白其冤不聽比兩人就獄則體仁已去位獄稍解謙益坐削籍式耜贖徒言官疏薦不納十七年福王立於南京八月起式耜應天府丞已擢右僉都御史代方震孺巡撫廣西明年夏甫抵梧州聞南京破靖江王亨嘉謀僭號召式耜拒不往而檄思恩參將陳邦傳助防止狼兵勿應亨嘉調亨嘉至梧劫式耜幽之桂林遣人取其敕印初式

耜議立桂端王子安仁王及唐王監國式耜以爲倫序不當立不奉表勸進至是爲亨嘉所幽乃遣使賀王因乞援王喜而亨嘉爲丁魁楚所攻勢窘乃釋式耜式耜與中軍官焦璉召邦傳共執亨嘉亂遂定唐王擢式耜兵部右侍郎協理戎政以晏日曙來代式耜不入朝退居廣東順治三年九月大兵破汀州式耜與魁楚等議立永明王由榔乃迎王梧州以十月十日監國肇慶進式耜吏部右侍郎東閣大學士兼掌吏部事未幾贛州敗報至司禮王坤迫王赴梧州式耜力爭不得十一月朔蘇觀生立唐王聿錞於廣州式耜乃與魁楚等定議迎王還肇慶遣總督林佳鼎禦觀生兵敗歿式耜

視師峽口十二月望 大兵破廣州王坤趣王西走式耜趨赴王王已越梧而西四年正月 大兵破肇慶逼梧州巡撫曹暉迎降王欲走依何騰蛟於湖廣丁魁楚呂大器王化澄皆棄王去止式耜及吳炳吳貞毓等從乃由平樂抵桂林二月 大兵襲平樂分兵趨桂林王將走全州式耜極陳桂林形勢請留不許自請留守許之進文淵閣大學士兼兵部尙書賜劍便宜從事平樂潯州相繼破桂林危甚總督朱盛濃走靈州巡按辜延泰走融縣布政使朱盛調副使楊垂雲桂林知府王惠卿以下皆遁惟式耜與通判鄭國藩縣丞李世榮及都司林應昌李當瑞沈煌在焉 大兵於三月薄桂林

以騎數十突入文昌門登城樓瞰式耜公署式耜急令援將焦璉拒戰凡三月式耜身立矢石與士卒同甘苦積雨城壞吏士無人色式耜督城守自如故人無叛志援兵索餉而譁式耜括庫不足妻邵捐簪珥佐之既而璉兵主客不和譟而去城幾破者數矣會陳邦彥等攻廣州 大兵引而東桂林獲全璉亦復陽朔及平樂陳邦傳亦由潯復梧州王聞捷封式耜臨桂伯璉新興伯式耜初請王返全州不聽已請還桂林王已許之會武岡破王由靖州走柳州式耜復請還桂林十一月 大兵自湖南逼全州式耜偕何騰蛟拒卻已梧州復破王方在象州欲走南寧以大臣力爭乃以十二月還桂

林五年二月南安侯郝永忠駐桂林惡城外團練兵盡破水東十二村殺戮無算與式耜構難式耜力調劑永忠乃駐興安三大兵前驅至靈川永忠戰敗入桂林請王卽夕西走式耜力爭不聽左右皆請速駕式耜又爭王曰卿不過欲予死社稷耳式耜爲泣下沾衣王甫行永忠卽大掠捶殺太常卿黃太元式耜家亦被掠家人僑騰蛟合箭乃出城日中趨印選諸營自靈川至亦大掠城內外如洗永忠走柳州印選等走永寧明日式耜息城中餘燼安撫遠近焦璉及諸鎮周金湯兆佐胡一青等各率所部至騰蛟軍亦至三月大兵知桂林有變來襲抵北門騰蛟督諸將拒戰城獲全時王駐南

寧式耜遣使慰三宮起居王始知式耜無恙爲泣下閏三月廣東李成棟江西金聲桓皆叛大清據地歸式耜請王還桂林王從成棟請將赴廣州式耜慮成棟挾王自專力爭之乃駐肇慶十一月永州寶慶衡州並復式耜以機會可乘請王還桂林圖出楚之計不納式耜身在外政有闕必疏諫嘗曰臣與主上患難相隨休戚與共不同他臣一切大政自得與聞王爲褒納而是時成棟子元允專朝政知敬式耜袁彭年丁時魁金堡等遂爭相倚附六年正月時魁等逐朱天麟不欲何吾騶爲首輔召式耜入直以文淵印畀之式耜終不入也未幾騰蛟聲桓成棟相繼敗歿國勢大危朝士方植黨

相角式耜不能禁七年正月南雄破王懼走梧州諸大臣許  
時魁等下獄式耜七疏論救胡執恭之擅封孫可望也式耜  
疏請斬之皆不納九月全州破開國公趙印選居桂林衛國  
公胡一清守榕江與寧遠伯王永祚皆懼不出兵 大兵遂  
入嚴關十月一清永祚入桂林分餉榕江無戍兵 大兵益  
深入十一月日式耜檄印選出不肯行再趣之則盡室逃  
一青及武陵侯楊國棟綏寧伯蒲纓寧武伯馬養麟亦逃去  
永祚迎降城中無一兵式耜端坐府中家人亦散部將戚良  
勛請式耜上馬速走式耜堅不聽叱退之俄總督張同敞至  
誓偕死乃相對飲酒一老兵侍召中軍徐高付以敕印屬馳

送王是夕兩人秉燭危坐黎明數騎至式耜曰吾兩人待死  
久矣遂與偕行至則踞坐於地諭之降不聽幽於民舍兩人  
日賦詩唱和得百餘首至閏十一月十有七日將就刑天大

雷電空中震擊者三遠近稱異遂與同敞俱死

明史 忠烈  
紀實王 贈式

耜粵國公  
諡文忠

龔立本字淵孟讀書好古才高氣雄萬曆乙卯舉於鄉選太平  
府教授遷福安知縣調繁崇德政最遷南京刑部主事是時  
江東烽火相望兵部日牒奸細百餘人下刑部立本提牢奮  
筆縱捨若干人尙書范景文大怒立本跪告實民非賊乃解  
卒坐鞠獄輕降調歸先是孫承宗視師遼東將以監紀舉立

本立本以親在辭古文詞初為六朝晚效秦漢

錢志

許士柔字仲嘉天啟二年進士改庶吉士授檢討崇禎初歷遷左庶子掌左春坊事先是魏忠賢既輯三朝要典以光宗實錄所載與要典左乃言葉向高等所修非實宜重修遂恣意改削抵牾要典者崇禎改元燬要典而所改光宗實錄如故六年少詹事文震孟言皇考實錄為魏黨曲筆當改正從原錄時溫體仁當國與王應熊等陰沮之事遂寢士柔憤然曰若是則要典猶弗焚矣乃上疏曰皇考實錄總記於世系獨略皇上娠教之年聖誕之日命名之典潛邸之號聖母出何氏族受何封號此皆原錄備載而改錄故削之使聖朝父子

母后兄弟之大倫皆闕而不明缺而莫考其於信史謂何疏上不省體仁令中書官檢穆宗總記示士柔士柔具揭爭之曰皇考實錄與列聖條例不同列聖在位久登極後事編年排纂則總記可以不書皇考在位僅一月三后誕育聖躬皆在未登極以前不書之總記將於何書也穆廟大婚之禮皇子之生在嘉靖中故總記不載至於冊立大典編年未嘗不具載也皇考一月易世熹廟之冊立當書皇考之冊封獨不當書乎體仁怒將劾之為同列沮止士柔復上疏曰累朝實錄無不書世系之例臣所以抉摘改錄正謂與累朝成例不合也孝端皇后皇考之嫡母也原錄具書保護之功而改錄

削之何也當日國本幾危坤寧調護真孝慈之極則顧復之  
 深恩史官不難以寸管抹殺之此尤不可解也疏上報聞體  
 仁滋不悅會體仁喉劉孔昭劾祭酒倪元璐因言士柔族子  
 重熙私撰五朝注略將以連士柔士柔亟以注略進乃得解  
 尋出為南京國子祭酒體仁去張至發當國益謀逐士柔先  
 是高攀龍贈官士柔草詔詞送內閣未給攀龍家故事贈官  
 誥屬誥敕中書職掌崇禎初褒卹諸忠臣翰林能文者或為  
 之而中書以為侵官崇禎三年禁誥文駢儷語至是攀龍家  
 請給去士柔草詔時數年矣主者仍以士柔前撰文進中書  
 黃應恩告至發誥語違禁至發喜劾士柔降二級調用司業

周鳳翔抗疏辨不報士柔尋補尚寶卿丞遷少卿卒子琪詣  
 闕辨誣乃復原官贈詹事兼侍讀學士明史

錢希言字簡栖博覽好學刻意為聲詩王百穀見其詩曰後來

第一流也薄游浙東荆南豫章屠長卿湯若士諸公皆稱之

然恃才負氣人爭避之卒以窮死列朝詩集

馮復京字嗣宗玘元孫強學廣記少業詩鈞貫箋疏著六家詩

名物疏六十卷謂冠婚喪祭不當抗家禮於會典作遵制家

禮四卷羅舊聞述先德作常熟先賢事略十卷族譜四卷年

四十餘始見實錄謂通記詳而野吾學裁而疎弇山炫博妄

而謬憲章典則自鄙無譏作編年書駁正得失曰明右史略

草創未就卒長子舒別有傳

錢志

瞿純仁字元初莊八世孫築室拂水巖下與一時名士瞿汝說

顧雲鴻錢謙益邵濂輩讀書其中拂水文社遂甲吳下純仁

狀貌豐偉如河朔愴父而所為文鮮妍妙麗如時花美女終

不得志以死

錢謙益誌

薛道文字懷耕隱居樂志事二親克盡孝養居喪慟哭幾失明

士大夫稱其純孝弟無後以其遺產千金盡歸二女曰我稍

自給不可因以為利也崇禎間巡按御史路振飛請旌其廬

以壽得賜章服邑有司請為鄉飲賓子紹奎有行義捐貲建

石梁以利涉建官廩以備賑

康熙志

何允泓字季穆鈞季子少習詩歌古文長而學問日成自唐宋

以來經世大典如杜鄭馬邱四氏之書攬摭解剝窮極指要

好談三吳水利訪問三江古道及夏周疏濬遺蹟窮鄉沮洳

扁舟往返嘗遇盜奪襪被忍凍以歸卒年四十有一

列朝詩集

陳三恪字象賢年十八代其父士介教授早夜力學旁通堪輿

卜筮壬遁風角家言錢謙益為撰玉淵生傳

錢志

王夢鼐字兆隆崇禎辛未進士知烏程縣改襄城建永安堡武

定寨於張村以遏寇盜巨盜混十萬黨至夢鼐單騎擒其魁

晉刑部主事工部郎中出知保定府蠲雜徭清馬政剪除豪

民劇盜闖人貴戚不任公家賦者皆就役時添兵一萬專責

府餉又議買南征戰馬千餘匹皆抗疏力爭歲得省餉三十萬而市馬事亦不果行卒於官兄夢鼎字兆吉天啟丁卯舉人官吏部司務為人孝友與夢錚并衣其炊居鄉急病讓夷不遺餘力留意邑中文獻搜羅放失後錢陸燦修邑志證據多其手訂錢志

嚴棻字子張澤子少穎悟工書畫篆刻兼善騎射崇禎甲戌登進士知信陽州地當寇衝繕守禦練鄉勇賊興世王者銳悍無敵棻與巡撫陳必謙部將陳永福李國禎等擊之斬俘而歸時虛象昇督師河上獨與棻商榷軍務如左右手轉戰趙莊邢集平關等處皆以少勝衆總兵祖寬不戢下棻以牛酒

犒師不合入城民得安堵丁艱服闋薦起為兵部主事未任

順治初大吏交薦自以衰廢固辭卒

錢志

蔣蓁字畹仙崇禎丁丑進士除南海知縣催科有法猾吏不得

乾沒慮囚痛懲誣供及為飲章者擒治妖人熊順吾不致蔓

延煽變丁艱服闋補建安縣時多盜警蓁濬城隍行保甲募

鄉勇得勝兵數百屹若雄鎮巡撫張肯堂舉廉幹第一陞禮

部主事未赴遭國變杜門著述年六十卒

陳志參  
錢志

許孟卿崇禎丁丑進士建寧推官清心寡欲介石自勵署建安

篆撫字勤勞卒於官啟其篋惟敝衣數事僚屬為之殯斂福建

通志

張履端字雲翎天啟甲子舉人知鄱陽縣初朝淮王卽白宗人  
害民狀親藩爲斂威流寇猖獗履端糾集鄉勇斬數百人復  
以計縛賊首何應鰲等調守兵趨鰲魚寨賊盡解散時楚藩  
失利援兵紆道至饒履端犒之而嚴爲之備民得安堵入  
國朝隱桃源澗作北門行以見志智志  
陳黃道字震芝幼而膂力過人精弓槊尤諳火攻法從軍留都  
會東事告警人海偵探至旅順適大兵破總督王某軍黃  
道救護總督敕印登舟颶風大作同舟無人色黃道奮然曰  
馬革魚腹惟天所使僅而免達於留都上總督之敕印爲信  
後隸兵部尙書范景文管水標營事時兵不滿千艘不滿百

黃道駐札水西門調度有方從景文擊獻闖兩賊血戰安廬  
潛六間閣部史可法知其功授御營勇衛右營中游擊加銜  
授部劄福王監國以扈駕功贈封三代明亡後隱居福山以

終錢陸燾傳

陳煒卿字希文迺玄孫仕至湖廣布政司理問張獻忠寇武昌  
城陷死之妾馮氏陶氏子垆芳暨一女俱殉一門死者十二

人陳祖范陳氏家乘

張承慶字濬浦文麟曾孫仕蘄州衛經歷獻賊陷蘄承慶投河

死妾徐氏與幼子及家人沈堂等十一人俱從死嚴龍翔傳

項志寧字靖伯少孤好學能文屢試棘闈不售福王時始以選

貢入南都一日謁同里巨卿甫就坐闈人報大僚某某至志  
嚮退入屏後聞其言惟媚事權要為營私植黨計亟歸泣語  
弟志康曰事不可為矣及薙髮令下遺書知交約同殉題詩  
於壁遂不食死門人私謚曰文烈時里中先後殉義者屈坦  
之字毓菴文行修潔為鄉祭酒甲申之變不食七日死鄉飲  
賓祝舜齡聞變觸階死子汝祥哭殮畢與妻葉氏子萬壽投  
井死 國朝乾隆四十一年並奉

旨入忠義祠王道煥邑令王鈇後裔城破遇兵死二子一女俱

絕食死

陳如鑒傳  
參習志

徐擇字瞻淇家貧少時寄食外家苦心力學為諸生卓然自立

甲申聞變慟哭不食欲死家人每謹伺之乙酉 王師至薙  
髮令下擇湛然如常呼婦共弈婦方屑麥為飯不應強之終  
一局歎息而起題詩留几上闔戶自經 本朝乾隆四十一  
年奉

旨入祠

徐守質字野王有聲庠序兵至母病不能去謂兄基曰不可俱  
死斷徐氏世兄長宜行守質當侍母基曰弟賢不可徒死我  
無益於時當侍母死生以之相讓且久兵勢益急基乃棄妻  
子逃守質被二創死母與妹俱沈井中 國朝乾隆四十一  
年奉

旨入祠

馮知十字彥淵復京季子縣學生爲人有謀而勇於義知明將  
亡乃招致四方奇士知星曆善弓馬者座上恆滿福王時挾  
策入南都有內臣識而奇之將草疏舉爲總兵知十恥由奄  
寺進固謝止之鄉兵起衆且數萬知十歎曰此輩但拍手將  
駭而走何能爲耶諒爲義士不當苟免我居此以俟死耳七  
月十三日 大兵至邑知十在友人何氏舍猝遇之奮臂格  
鬪飛矢中胸仆地被斫死 以上並馮班海虞三  
義傳參忠烈紀實  
徐守貞諸生奉母避兵於鄉鄉兵起守貞以母病不能遷兄守  
噩謂之曰爾去我留方相讓而兵至守噩遁母與妹俱投井

守貞亟從之兵挽其髮乃踞坐謾罵殺於井傍

南疆繹  
史附傳

許重熙字子洽上蔡知縣河孫爲太學生以史學著當世崇禎  
九年刻五陵注略觸誠意伯劉孔昭忌將發難祭酒倪元璐  
爭之因并攻元璐牽連參閱姓氏七十五人俱東林指名時  
溫體仁當國陰主之擬旨推究三上不允而解後周延儒復  
手相令所親敦請不往 錢志  
錢謙貞字履之順德孫少孤嗜學受知於邑令楊漣多病絕意  
場屋讀書求志闢懷古堂奉母所與游惟魏冲馮舒輩閉門  
卻掃有古隱士風初爲詩好劉長卿韋莊羅隱許渾之作後  
更深於韓杜元白旁獵蘇陸能度曲審音尤善書法所著有

未學菴稟年五十四卒子孫保字求赤爲人方嚴抗特勤讀

書有父風列朝詩集馮班傳錢志合纂

錢安修字方明爲諸生七試皆第一游於張溥之門稱高弟子

所作詩古文辭堅古峭拔年二十九卒康熙志

毛晉原名鳳苞字子晉世居迎春門外七星橋父清以孝弟力

田起家當楊漣爲令時察知邑中有幹識者十人遇有灾荒

工務倚以集事清其首也晉少爲諸生晚乃謝去游錢謙益

之門好古博覽性嗜卷軸於是湖州書舶雲集於七星橋毛

氏之門矣邑中爲之諺曰三百六十行生意不如鬻書於毛

氏前後積至八萬四千冊構汲古閣目耕樓以度之患經史

子集率漫漶無善本乃刻十三經十七史古今百家及二氏

書手自讐校行於世至今學者寶之爲人孝友恭謹與人交

有終始尤好行善水道橋梁多獨力成之歲飢則連舟載米

分給附近貧家雷某贈詩云行野田夫皆謝賑入門僮僕盡

抄書蓋紀實也錢謙益誌其墓季子辰字斧季精於小學最

知名滎陽梅道人傳參康熙志

趙牧與福建人林籥舞俱爲平海將軍周崔芝客籥舞爲參謀

牧爲總兵鄭芝龍之降也籥舞陳八不可弗聽監軍朱永佑

謂崔芝曰虞山趙牧其人勇士也我欲使見芝龍而刺之不

果丁亥正月崔芝復海口籥舞與牧守之四月 大兵攻海

口牧出戰所殺傷過當又益兵攻之城破兩人皆死忠烈紀實

王奕昌字德符嘉言曾孫以貢除江西布政使理問遷廣西都司斷事署武宣陽朔二縣所至治辦靖江王亨嘉久蓄異志奕昌刺得其牋密告巡撫瞿式耜早為之備乙酉七月唐王建號亨嘉拒命襲破梧州禽式耜以歸囚之邸中奕昌遣間使饋鮭菜得式耜密書星夜趣東將吏進兵亨嘉就縛亂遂定丁亥永明王從桂林走楚式耜留守桂林奕昌以府同知守柳 大兵逼桂林分兵從潯州略左右郡縣趨柳叛將李明忠據潯以瞰柳分守副使知府推官皆遁奕昌獨與馬平令城守明忠劫降書至奕昌縛其使械送桂林誓死待援會

武宣狼目廖文登等襲沈北舟思恩侯陳邦傳復潯州明忠遁柳乃固是年夏式耜奏擢奕昌為按察僉事監陽朔軍與新興侯焦璉恢復平樂戊子二月陞廣西右參議督理糧儲明年六月一日輓運至龍門為滇營亂卒所害贈太僕卿錢謙益墓誌

鄧大臨字起西號丹邱韞曾孫幼孤稍長力學師事江陰黃毓祺乙酉秋江陰城守不下毓祺起兵竹塘應之大臨亦募兵崇明事敗毓祺亡命淮南以官印印所往來書為人告變捕入金陵獄大臨職納橐餽獄急毓祺以所著小游仙詩園中草授大臨坐脫而去當事戮其屍大臨號泣守喪鋒刃之中

贖其首聯之於頸棺殮送歸當時稱毓祺之門有徐趨與大臨趨則抗節而死者也大臨師死之後徧走江湖後為黃冠

以卒 黃宗羲墓誌

許士儉字季約士柔弟諸生順治乙酉江南降士儉合義士陳

龍威問道上書山陰張天司馬時奸民乘亂焚掠士儉聞嫂

嬰難奔救於鄉鄉人見士儉未薙髮欲邀功於守帥遂殺之

龍威還以監國命授兵部職方司主事士儉死已數日矣 吳卓

信傳從弟士驥字德生甲申後從瞿式耜入廣西主客喧厯支

武橫決累建奇策噤不得施攝蒼梧縣城破縊死 蔣莘田傳

秦君台失其字順治乙酉七月 大兵至君台抗節不屈遂破

殺二子俱死妻某氏抱二孫投樓下死幼子被掠明日聞一

門死狀乘間投河前後死者七人 吳卓信文稿

桑升吉字階貞母病割肱值院試手不能書止完論義提學得

狀卷面批一孝字遂補諸生乙酉七月殉難 明代采芹錄

石電長身赤髭能挽強超距尤善槍崇禎八年流賊圍桐城電

與壯士陳英從指揮包文達往援二月追賊於宿松文達輕

進中伏死英電分左右翼搏戰英躡被擒電大呼往救賊圍

之數重電力盡捨弓矢手槍復殺數人賊羣斫之頭既斷猶

僵立作擊刺狀良久乃仆桐人招其魂祀之余忠宣廟下 石志

參錢志

志

蘇州府志卷第一百  
人物二十七  
常熟縣  
國朝  
楊彝  
馬班 兄舒子行賢 從子武 舒孫脩  
王維寧  
屈欽 子永清  
孫穀  
席琮 斑  
李臨 曾祖登 父文遴  
許文山 子徹 永 易  
沈萬育  
龔廷煥  
何雲 祖錚

蘇州府志卷第一百

人物二十七

常熟縣

國朝

楊彝

馬班

王維寧

屈欽

孫穀

席琮

蘇州府志

卷一百

人物二十七目錄

李臨

許文山

沈萬育

龔廷煥

何雲

孫永祚

子徹

永 易

曾祖登

父文遴

兄舒子行賢

從子武

舒孫脩

祖錚

子永清

子徹

永 易

琮 斑

登 弟 望

王 澧 父日俞 弟漢 孫 錢朝鼎 子瑗

翁長庸 子大中 翁需

孫 魯 徐文蔚 父梁

錢延宅 孫孫詒 邵 燈 父梁 許 瑤 子世忠 世孝

孫承恩 弟賜 陸貽典

錢 曾 錢陸燦 子飛熊

沈 卓 陳帆 陳 協 陳玉齊 周臺 陳如鑿 龔 庠

瞿有仲 陳祺芳 瞿昌文 叔元銷

朱元裕 曾祖士達 父洪基 從父瑋 子鴻勳 周慶曾 父士宏

鄧林梓 程雲蛟

嚴 慎 浦士瑜 子恆

徐 蘭 魏士升

陳鶴徵 錢 嘏 凌竹

羅 美 瞿世壽

陳文照 邱 園

許德璠 父國賢 何世貞

顧 四 周允揚

錢 嘉 汪應銓

周陳俶 趙廷珪 父延先

許 珽 陸士炳 父廷祉

蔣伊

翁叔元

歸允肅

蘇翔鳳

郭學淮

陳芳績

黃儀

薛熙

顧天申

蔣陳錫

陶元淳

瞿孝春

汪繹

嚴虞惇

陳逢午

曾倬

錢良擇

歸鴻

許穀

蔣廷錫

父起先

父祖廕

父梅

歸晟

子連

河

子士鑑

澍

澍

子桷

子貞一

貞一

子士鑑

父煌圖

祖道生

父振甲

王譽昌

邵陵

父煥

父豐

子朝

蘇本潔

鄒元斗

邵世泰

曾祖世茂

子玉瓚

歸宣光

子熙

孫德威

趙廷珂

陸輅

父尊禮

張澗

李安臣

張汝璧

子尚謙

孫國綱

張爾翔

子九苞

陳洪謨

子一本

席永恂

父啟寓

弟前席

王琛

嚴有禧

陳祖范

沈淑

席釗

兄鎬

弟整

王峻

子本智

孫天寅

從弟瀧

淇

子燧

謝晉

丁斌 父湜 子晉高

宋顧樂 沈翀

瞿駿

馬璟 子重 孫鈺

席雍 子紹元 紹凱 弟龔克庸 父大潛

蔣溥 子懋 賜榮 元樞 陶正靖

謝元陽

錢鑿

趙森 曾祖廷爽 祖茂良 父友倩 弟貴栻 子同

魚翼

友志貞

曹天佑

葛光燾

張友誠

戴兆箕

殷鉉

程允元

趙嗣孝 王子齡等

蘇宗芑

方煥先


潘灤

王松齡

馬維仁

吳長生

陸祿



蘇州府志卷第一百

人物二十七

常熟縣

國朝

乾隆志常熟人物國朝首列錢謙益後又鏟去故今坊間有未鏟已鏟二本道光志無錢謙益傳從已鏟本也今仍道光志

○楊彝字子常明萬曆末士之為時文者喜倡新說畔違傳註彝與太倉顧夢麟思振其弊相與講論辨難力明先儒之說天下翕然從風稱楊顧學弟子著錄者數百人吳中名士興復社彝為眉目屢試不遇以歲貢為松江訓導薦授都昌縣

移疾不往明亡杜門不出彝性孝友母歿嘔血數升斷酒食

終喪撫孤姪有恩少所事師死獨力殯埋之且為婚嫁其子

終身力學晚歲目盲猶時令人讀書其側年七十九卒

汪琬兩先子靜字定夫自少能詩文為諸生年二十二卒

啟禎遺詩

○孫永祚字子長號雪屋幼即貫穿經史為諸生有名門弟子

日進所著古文詩賦甚富工書法一時物望如董其昌鍾惺

諸前輩皆稱小友世稱虞山有兩子長常長同音謂楊彝永

祚也崇禎乙亥以選貢授推官弗赴隱居教授每語弟子曰

文章事業不從五倫中出者總為無本之學父母歿數年哭

如孺子身長八尺鬚眉如畫氣體肅然人望之如陳寔王烈

也年八十餘卒

錢志

○馮班字定遠復京仲子為諸生連蹇不遇遂棄去發憤讀書

工詩其詩沈酣六代出入義山牧之飛卿之間其論詩謂王

李死擬盛唐戒不讀唐以後書詩道因之大壞於是窮流溯

源自三百篇以不一一考其根柢明其變化所自其論文謂

韓吏部之文古文也歐陽公之文只是今文不如唐人四六

尚有古意古語書法四體皆能尤工小楷有晉唐人風致其

為人落拓自喜奴視法度士意所不可掉臂去胸有所得曼

聲長吟經行市中履陷於淖衣裂其幅望望去之如無見一

人者當其被酒無聊抑鬱憤懣輒就座中慟哭人亦不知其

所以班行第二時稱為二癡云兄舒字已蒼舍咀經史穿穴  
 百家自為馮氏一家之學為人直腸快口不避權要小人嫉  
 之如仇構釁於邑令指所著懷舊集為訕謗曲殺之班子行  
 賢字補之弱冠能詩嘗舉博學鴻詞工書法尤精篆刻匹文  
 三橋弟行貞字服之倜儻不羈善擊劍攢槊投石挽強嘗從  
 康親王南征有功棄之歸仍事筆研間工畫松石又班弟知  
 十子武字寶伯亦能詩善書舒孫修字念修從陳瑚游安貧  
 自守亦工詩錢會二志合纂

○何雲字士龍祖錞字言山讀書朱黃不去手書法祝允明雲  
 能古文詞尤熟唐史凡唐人詩有關時事者歷歷指出如日

觀錢謙益延致家塾崇禎丁丑謙益被訐下獄雲慷慨誓死  
 草索相從世以郭亮王咸擬之後從瞿式耜至閩粵流離十  
 五年復歸故園謙益謂其才情意匠蒼老雄健錢志

○王維寧字古臣居東韓莊自號寒溪子好游善畫所至輒圖  
 其勝以歸嘗與友人結西湖看花社歲一往前後凡十七至  
 嘉定黃淳耀序其詩比諸方元英陸魯望云海虞詩苑

○龔廷煥字孟明立本從子少為諸生有文名入國朝謝去  
 儒冠巡撫土國寶聞其名具書幣命無錫令造門勸駕往返  
 再三堅臥不起以遺民終海虞詩苑

○屈欽字駕生

縣志字脊龕

坦之子諸生執經孫永祚之門楊彝願

夢麟輯四書講旨多資參訂於性理經術務力行之不徒騁

講說子永清字國士歲貢生治毛鄭詩貫究傳箋疏節直腸

不為委曲之行屈氏自推官輜至永清九世儒業不墜楚斬

盧紘顏其堂曰九葉一經舊志參家譜

○沈萬育字和卿天性至孝鼎革時負母避兵遇盜捨身衛母

盜憐而俱全之母病篤夢神示某醫可愈傾囊延治果愈建

橋梁施棺槨以成母志年九十四臨歿呼父母雍正四年旌

通志

○孫穀字君升家莫城里當崇禎末萑苻竊發村民遠徙穀侍

病母獨居滌穢驅蚊目不合睫者兩月有白腰兵闖其門穀

恐驚母拒門求哀賊怒斫其肩悶絕仆地賊直入執母穀少

蘇匍匐抱母曰殺我無恨求釋我母賊詫曰孝子也不可犯

乾隆二年旌陶貞一傳

○許山字青浮父宸章字彥徵以副貢官浙江副使山年甫冠

念父宦游遇兵道梗丐而往邏卒呵之泣以告僅而獲免時

父已掛冠居金華山中初見不相識已而相向哭失聲遂奉

父間道歸山自嬰國難不求宦達甘貧苦吟詩近小杜喜畫

秋花病蝶落葉寒蟬以寄其蕭瑟之致子三徹有詩名永善

畫易弱冠游太學以石鼓賦知名陳言志參詩苑小傳吳卓信傳

○席珽字廷玉琮字宗玉兄弟力田服賈兼有幹畧明末多盜

鄉里資保護焉昭志

○李臨字大宜曾祖登與弟望嘉靖中從邑令王鈇禦倭有功父文遴隱居為善臨事親孝周恤宗黨禦災捍患身為倡導自少博學工文舉於鄉需次縣令卒言志

○王澧字楚先父曰俞字喜賡少勤學父母憐而節之乃帷燈潛誦以舉人教諭六合明崇禎末與子澧同登進士知餘姚縣期年去官 國朝順治九年道光志作元年今從縣志澧以薦起為行

人奉使河南丁酉分校京闈時科場事發舉主皆得罪澧獨超然事外遷工部都水主事權南新關陞屯田員外郎治山東南旺河搜湮浚新使岱畎之水皆歸運道陞刑部郎中凡

成案過當即與改正不更駁回所平反甚眾終金華知府弟漢字文筠康熙五年舉人官溧陽教諭孫守烈字大武少與其兄守勳並有文譽康熙庚辰進士授司經局正字補刑部主事遷員外郎執法不少假托心泣職不受私謁陞禮部郎中出知贛州府卒陳陶二志參常昭合志

○錢朝鼎字禹九順治丁亥進士授刑部主事歷員外郎中遷廣東提學道為天下學政第一陞浙江按察使發奸摘伏無偏徇桐廬有僕弑主移獄於主妾與一童子為姦殺已誣服矣朝鼎視妾一弱女童子尤孱羸而僕為之證者目動而言詐乃厲聲詰曰弑主者汝也僕驚具服遂出二人罪湖有盜

黨竄入司署為吏每鞠是獄立案傍刺探獄情陰為營救朝鼎疑而訊之遂并伏辜超擢副都御史忌者借 欽案未結劾之會丁內艱歸服闋補鴻臚卿遷大理少卿山西有烈婦不受鄰人挑自縊死婦已旌鄰人僅擬遣戍朝鼎爭之曰戍者尚可生還異日掉臂出入烈婦坊下天理與國法俱驕矣法司乃從其議卒以前忌者鐫級罷歸會陳二子瓚字孚美康熙己酉舉人知館陶縣有善政官至戶部員外郎道光志

○翁長庸字玉宇順治丁亥進士授戶部主事權蕪湖關溢稅四萬餘金盡數解部歷官至長蘆運使參政河南臨事謹慎待百姓如家人聽訟諄諄勸諭多感泣謝去先是中州下治

田令州縣偽報起科至數千頃察之石田也亟請於大吏免其租役秩滿當遷按察使不願典獄遂告歸其貧不異為諸生時也子大中字林一舉進士知上杭縣縣輸賦向有額外公費大中盡革之又令納戶自封投櫃民稱便歲旱米貴大中開倉平糶且捐米以給不能辦值者埋齒掩骼善政多可紀卒於官杭民醵金歸其櫬祀名宦同邑翁需字雲將與長庸同舉於鄉教諭和州遷上杭知縣正風俗革耗羨禁蠱毒每當讞決反覆諭以情理訟者常涕泣釋爭而去福建通志常昭新志

合纂

○徐文蔚字宣采順治四年副貢授汝寧推官治獄明允案無

留牘修學課士汝人稱之陶志

○孫魯字孝若廣東布政朝肅子順治壬辰進士授衢州府推官西安民祝廿五為從子所殺埋尸滅跡獄久未決魯廉察得實案治從子與其黨如法其餘多所平反遠近翕然陞高州府同知缺裁補紹興府同知俸滿遷大同知府大同近邊而俗朴民未知禮魯到官首行鄉飲酒禮舉故總兵麻振揚為大賓禮儀秩然民間驚告為盛事設義學拔諸生文行優者以為師比屋有弦誦聲 大兵討吳三桂調發旁午魯辦理芻糧有法民以不擾以母老乞終養尚書魏象樞聞之歎曰家有孝子國少一廉吏矣歸里後貧甚杜門色養備至母

卒魯哀慕逾年亦卒錢志

○邵燈字薪傳世有名德父梁字公輿髫髻好學浹熟經典抗顏為人師所獲束脩悉供甘旨燈弱冠登賢書江南賦稅舊簽大戶收解往往破產燈議按畝貼役以官吏董其事條上遂為定例順治九年進士除中書量移比部明敏無留獄律比務從輕條外轉僉臬視河汴宋閒向開引河所上工狀率不以實燈親馳閱視計所當濬者十之二三餘皆罷之省官帑萬計河工大柳諸項派入郡協俱頗有乾沒燈發論戒飭不致浮冒勤其官以歿會錢陳各志

○錢延宅字大士明副使時俊孫順治九年進士授行人出使

寧夏湖廣陞祠部主事常例考選臺員部曹不與順治庚子

特與一體考選授御史巡視陝西茶馬請蠲苑馬各監積欠

錢糧陳東南民力困竭請蠲荒糧禁預徵皆時之急務孫孫

詒字庭堅醇謹篤學以選貢教習八旗子弟需次知縣卒

陳陶

○許瑤字文玉士柔子順治壬辰進士歷工部都水司郎中管

衛輝等處河務擢知廣平府分巡河西轉川北參政子世忠

字貞服世孝字念皇俱副貢以詩名世忠詩力樵香山

縣志

○孫承恩初名曙字扶桑為諸生負才標望以選牘文體不正

被論除名又以太學生領順天鄉薦順治戊戌殿試第一授

修撰數被顧問寵遇日隆從幸南海子

賜騎御閑名馬適大風揚沙中寒疾卒年僅四十承恩為人孝

友文工六朝詩學溫李書法歐陽邑人以狀元登第者自承

恩始弟暘字赤崖少遊文社名與兄埒順治丁酉舉順天鄉

試科場事發牽連謫戍尙陽堡

聖祖東巡獻頌萬餘言

召至幄前賦東巡詩試以書法

上歎惜其才大學士宋德宜疏薦不果用久之還里

錢志參沈

菴傳

○陸貽典字敕先博學工詩其論詩謂法與情不可缺一言法

者如唐詩品彙吟卷文鑑之選非詩法也言情者曰詩主於趣不必問學趣主於新不必合理此詩歸所謂情非詩情也

工書法漢隸尤勝

曾陳二志合纂

○錢曾字遵王少學於族祖謙益謙益謂能紹其緒撰吾炙集標曾詩為首絳雲樓燼餘書籍及詩文稿悉付藏弄其注初學有學集詩探索羣書發皇幽渺海內詩人多稱之述古堂藏書多善本撰讀書敏求記識其源委

曾陳二志合纂

○錢陸燦字湘靈高才嗜古為經義清真老硬順治丁酉鄉舉第二科場弊發覆試者再名皆前列未幾以糧案註誤教授毘陵金陵閒詩歌骨力雄厚一掃浮靡古文不名一家磊落

自喜晚年偕徐乾學王日藻秦松齡周金然尤侗黃與堅等為耆年會陸燦無位而齒最宿名最高諸公皆兄事之

陳志子

飛熊字鷹揚康熙戊午舉人

道光志

○沈卓字秋士諸生家貧居市廛超然物外詩格近孟東野李長吉同里陳帆字秋浦詩字畫稱二絕人亦狷潔

陳志

○陳協字鄴仙工詩詞阨窮潦倒家城西山麓日與馮班輩上下巖谷清詞麗句下筆不能自休同時陳玉齊字在之周臺字雲書皆以詩名又陳如鑿字子兼龔庠字鄞僧皆攻詩窮

餓而死

陳志

○瞿有仲字有仲純仁孫少游陳瑚之門與人交訥訥不出口

對知己則辯論泉湧驚其座人其詩亦多鬱勃感激之概同里陳祺芳字子壽為諸生客游遍天下詩文豪宕有逸氣

陳志

○瞿昌文字壽名式耜孫性豁達能行度外事年十七念其祖

在遠欲往省恐父母惜其年少不聽一日早起襪被獨行家人覺之急遣力齋資用追及於杭州僧舍間關萬里微服隱名冒矢石陷重圍幾死者再然後得達式耜誦退之知汝遠來之句且喜且悲後竟裹骨而歸將歸又幾落虎口式耜以歿後英爽脫之事詳其家傳初昌文既往家書久不至其叔父元鎔繼往道阻不得達歿於永安

陳志

○朱元裕字護仙曾祖士達官雲南昆陽州同父洪基諸生慷慨

樂施元裕寄籍嘉定順治十八年進士授知蒲縣豁除前令虛報田賦諸生以貧困鬻子女於富室者為贖之山石可成鍊募工鍊鑄民賴其利康熙辛酉分校張泰交鄭崑璽柯榮庚皆其所得士行取入京觀政刑部告歸卒從父瑋字鳴之國學生順治時軍興貸餉瑋請獨輸五千金勿擾鄉里子鴻勳字卻塵讀書負氣時議加派折漕鴻勳以諸生奔懇臺垣得損去浮價

言志

○周慶會字燕孫父士宏有孝行慶會中順治戊戌會試念父

母年老試訖即歸辛丑父遣赴殿試仍乞假歸居十二年連丁內外艱以篤孝聞康熙壬子補內閣中書分校京兆試

戊午舉博學鴻詞科授翰林院編修分纂明史攷核精詳甲

子主浙江鄉試未入闈卒

錢陳志參  
陶志稿

祀鄉賢

道光志引  
常昭志

○鄧林梓字肯堂歙會孫年十三作空谷詩見賞於程嘉燧人

以鄧空谷呼之高才淹雅以布衣薦博學鴻詞卒於都

府縣  
志合

纂

○程雲蛟字際騰休寧諸生父葬常熟遂家焉事母孝兄早世

養其孤寡郡城舊有二程夫子祠歲久圯捐資移建飲馬橋

嘗一夕焚其責券三千五百金究心經史與馮班錢陸燦為

文字交

吳卓信  
未刻稿

○嚴慎諸生性耿介言動不苟嘗撫育其孀女孤甥一家數口

錢陸燦引紀叔姬歸鄗之義以美之

支溪  
志

○浦士瑜曾祖騫殉倭寇難妻葉守節四傳至士瑜生三歲而

孤家貧其母汪鞠而教之母病起思粥士瑜煮米得一甌自

持空盞侍其至性如此子恒字近倫販於江北一夕心悸曰

吾父殆矣急航海颶風陡作前舟覆榜人大駭恒自操舟徑

渡父果病亟刲股以進獲瘳又數年卒縛草墓側負販養母

母歿慟而絕絕而蘇日三四次妻王以哭姑死方父病亟時

鄰火延及恒以身蔽父風猛甚火忽越廬而過左右鄰蕩然

恆家獨無恙道光二十七年旌

天真閣集參  
茗香堂集

○徐蘭字芬若號芝仙少負才名善吟詠從新城王士正遊得

其指授士正序其詩稱其精悍雄拔高者似供奉嘉州次亦在樊川昌谷閒浙水沈方舟屈指虞山詩人亦以蘭為第一弱冠游京師淹留既久遂占籍焉蘭嘗從安郡王出塞所見祈連山中花數十種皆豔絕不知名一一圖以歸好事者爭臨摹焉其繪事可繼暉南田白描人物尤絕倫別裁集參海虞詩苑

○魏士升字允恭浣初曾孫由副貢教習除泰安知縣當事重其能文率命子弟師事之已而軍興轉餉自甘州至巴里坤五千餘里涉大漠土馬陷砂磧中輒沒不得出土升獨先至鞞袴握刀謁靖逆將軍將軍嘉勞之凡輸運者三勤勞甚著以俸滿行取至京卒陶陳各志

○陳鶴徵字青田以貢授上虞知縣初入境會大旱即徒步四十里禱雨龍潭雨立澍境有虎患是日自斃吏民咸神異之除劇盜厲利一及巨憨牛二四境得安歲餘罷以地方疾苦驛卒鋪兵營債鹽引除害與利未竟厥緒為愧作古言十四條以告來者昭志

○錢嘏字梅仙陳瑚弟子學有原本不務詞章客游四方必奉父母木主以往所至焚香上食事之如生有問業者必語以分年讀書之法昭志同時凌竹字南樓性敏多技能少游顧修遠陳確菴之門陸貽典云晉字唐詩宋詞竹兼有其長又工篆刻嘗錄邑中近時人詩繫以小傳成十二卷舊縣志

○羅美字澹生用遷固志傳體變左傳編年以便學者明究易理晚以醫術濟人又以堪輿家言勸人葬親貧乏者依助焉

昭志

○瞿世壽字贊皇其論詩謂求論工拙先辨首尾平生尤盡心於春秋經傳折衷宋元諸儒之旨著春秋管見孫昌熾諸生忠宣公墓隙地有謀葬者昌熾同族人訟於官墓獲全叛建宗祠捐祭田刊行春秋管見友愛兄弟撫姪推產分贍皆獨

力為之年八十餘卒

舊縣志

○陳文照字介英聚書續言喜為激昂慷慨之詞

昭志

○邱園字嶼雪東海侯岳之後隱居塢邱山跌蕩不羈縱浪詩

酒善度曲畫仿石田

昭志

○許德璠字荆生諸生父國賢居袁墅力行善明末江陰無錫

避兵來其鄉者國賢計口與之居食時簽大戶解白糧多破

產國賢為公正請於巡撫士國寶得奏改官運德璠繼父之

志勇於為善康熙初叩闕請減蘇松賦額每遭旱潦傾困施

舍貧不舉子者出貲收養邑之有育嬰堂自德璠始

陳志

○何世貞字公介諸生康熙初水旱洊至適少參李來泰泣學

世貞進講年饑章兼陳民瘼時弊情辭愷切環聽者數百人

邑令汗流色變以為謗已即學官擒毆之士庶譁噪少參撫

慰出之眾乃定剛正之氣至老不衰

昭志

○顧四失其名字支塘人康熙初海賊犯江寧制府郎某率舟

師討之募習水性者四在募中會賊以佛郎機擊制府倉卒

無以禦四挾制府過別舟得免賊平以功授游擊

支溪志

○周允揚字爾觀習騎射為兵備道材官擒太湖劇盜張三制

府郎某列狀聞得營職會丁父艱歸

陶志

○錢嘉字麟圖少孤奮欲樹立會討臺灣仗劍從軍署都司累

戰立功官至廣東春江協鎮署順德總兵嘗以二十五人射

退峒黎卒於任

晉陶志

○汪應銓字杜林其先休寧籍祖九漪見流寓應銓幼英敏甫

就塾課書四十行語師曰我尚能讀稍長從陳董策會倬遊

所學益進康熙丁丑登進士一甲第一人授修撰直南書

房未及散館

特擢左春坊贊善分校禮闈所得皆知名士應銓於經史靡所

不窺發為文章蒼古典奧詩淵源選體出入於韓蘇書法圓

勁秀逸人爭寶之歸里後主講鍾山書院與修湖廣江南通

志

蔣漣狀

○周陳俶字義扶父學繼自常熟徙嘉定母陳年二十三寡遺

腹生俶育於外家以陳姓補諸生與黃陶菴同研席講求性

命之學登康熙九年進士時年六十母尚在嘗貽友人書曰

某不以一第為榮以老母一生苦節得稍舒眉為幸時母年

八十三又六年終先是申酉年避兵遇大風雨負其母以行

母疾告天願減已算以益母壽

支溪詩錄引練音初集案陳倣入籍練川故邑志見遺

顧鎮支川小志始著為支塘人因據以增入

○趙廷珪字禹玉父延先字讓卿由副貢授安陸推官遷真定

郡丞時積寇高鼎踞常山趙郡間詭言授撫延先突入賊寨

慰諭之見其詞色不定疾馳還入平山城申倣守禦賊猝至

以有備得完擢東萊知府陞副使備兵鄜延以親老遽歸廷

珪登康熙庚戌進士選知林縣時編審人丁胥吏請增丁博

紀錄廷珪曰我豈以一級功名為百姓子孫之累且開除六

百餘丁行取授河南道御史請敕學臣修舉實政請禁郡縣

捕盜小吏株連無辜又言子報父仇不告官而擅殺者依律

杖六十蓋為未經審抵者言如擬抵結案遇赦免死者又復

擅殺是目無國憲相報無時已請分別定例使情法均盡又

遇赦減等人犯既邀再生妻孥去留宜聽自便事俱施行以

艱歸未及小祥卒

陳志參陶志

○許珽字廷玉九歲父士驥從瞿式耜贊軍務世亂道阻珽因

母蘇久病不忍遠離母歿即入粵始知父殉節本末墓已不

可辨嚙指血徧瀝白骨竟不能得招魂營葬廬墓三年抱木

主歸與母合葬同邑蔣伊為題其入粵尋親骸序後邑令陳

守創給匾獎之

昭志參家傳

○陸士炳字胥仲父廷祉字萬舟少爲諸生強毅特立士炳登康熙九年進士任通江知縣入爲文選主事稽勲驗封員外郎風裁峻整繩舞文吏不少假意所不可往往與堂上官力爭必伸已見乃已居家門無雜賓人稱其介

昭志

○蔣伊字渭公葵子康熙癸丑進士選庶吉士授監察御史巡視中城疏陳六部積習請減白糧之價嚴誣逆之條又請勤撫恤務開墾賑荒濟飢皆切中機務彈劾大吏不避權要時三逆未平征調四出伊以蘇州內地不必防禦所駐滿兵二千徒以擾民力請撤回又集民間疾苦繪十二圖以進聖祖覽之動容京師地震應

詔密陳三疏捐納例廣正途壅滯疏請澄汰疏通直聲震海內忌者扼之出爲廣東糧儲參議當兵燹後供億繁苦吏緣爲奸伊禁陋規革耗羨蠲滌煩苛粵人便之遷河南副使提督學政釐正文體杜絕請託所獎拔皆寒畯卒於官年五十七伊爲諸生時卽負經世志甫釋褐上所著玉衡臣鑒二錄生平見義勇爲篤於倫誼居家孝友待親族故舊有恩惜未究其用云

熊賜履墓誌

○翁叔元字寶林憲祥孫康熙丙辰進士第三授編修文望甚著與韓菼齊名戊午主山東鄉試所拔畢世特等皆知名士歷右贊善侍講侍讀陞國子監祭酒三遷吏部侍郎經筵

講官晉工部尚書部有大工四十三案十年未銷算叔元請

六部舉司官各二人分董其役并載而清乞假歸壬申起補

刑部尚書所平反全活甚衆丁丑致仕

韓莢碑  
參縣志

○歸允肅字孝儀父起先明崇禎末進士官刑部主事著易聞

詩通解允肅少凝重謹厚康熙己未進士第一授修撰辛酉

主順天鄉試所拔皆真才一空從前諸弊刑部尚書魏象樞

昌言於朝慶其得人日講官缺掌院屢列名上請未

俞允

聖祖忽於袖中出片紙則允肅名也進講周易毛詩進止端詳

敷奏明暢睢州湯斌歎曰講筵得正人天下有賴矣陞中允

歷侍講侍讀進講讀學士少詹事與議政事持正不阿以疾

告歸卒於家

康熙志縣  
志合纂

○蘇翔鳳字苞九父祖蔭順治壬辰進士除戶部主事督理清

江糧餉以廉幹稱忤勢要鐫秩後署泰安州事卒於任翔鳳

積學嗜古收名早而性位直雅不喜俗士康熙壬戌

登進士知沂水縣半月

陳一  
纂

○郭學淮字簪源少受業於父編以自勵伊令授經子弟年逾者始領康

授新津知縣以儒術從政而事大治引年歸卒學

父歿遺產悉與兄而獨奉養其母兄斥產盡老而無倚復迎

授新津知縣以儒術從政而事大治引年歸卒學

瞻之又婚嫁其子女置田宅以庇其生篤信朱子之說學者

宗焉陶志稿

○陳芳績字亮工居東唐墅父梅明諸生與顧炎武友善炎武

日知錄論保甲曾採其說芳績著有歷代沿革地理表與歸

文學晟為友均為炎武所賞晟歸氏世譜及虞陽科名錄均作恆晟字成伯諸

生劬學勵品工吟二人嘗以書訊炎武炎武以詩答之曰十

載江村二子偕相逢每詠步兵懷亭林集參歸氏譜

○黃儀字子鴻熟精輿地之學凡郡邑建置沿革與山川之險

易脈絡畫圖著說縷析條分能補桑鄴所未逮徐乾學修一

統志多用其說曾志

○薛熙字孝穆游孫永祚汪琬之門肆力古文詞著依歸集謂

遵守歸熙甫法程也曾志

○顧天申字輯侯諸生善飲酒酣歡舞抵掌間出新義嘗著學

庸講義及門如嚴虞惇言德堅皆高足云昭志

○蔣陳錫字文孫伊長子康熙乙丑進士除富平知縣擢禮部

主事監督海運倉除糧艘篷席銀以紓丁力遷員外郎授濟

甯道佐理河務革河夫供給各衙門薪柴弛湖陂葑菱水利

之禁厯天津淮徐道遷河南按察使部有老瓜賊雜平民中

戕賊行旅陳錫嚴捕窮治絕其根株道路以安陞山東布政

使晉巡撫山東鄉試解額六十名疏以為先聖舊邦不宜居

江西福建下因得廣至七十餘名長蘆鹽使請增引臨清關使請添設收稅所並疏陳其不可事俱不行久之擢雲貴總督滇南土酋常應運者有叛萌興兵擒斬應時撫定礦廠或硎老山空而課額不減疏請礦旺則開礦衰卽止隨收隨解勿爲定額常德至鎮遠險灘數十處恠石岩峇倡屬捐金鑿平之又旁開溪路以避灘險奉

命勞軍衛藏未至卒陳錫天性孝友接物和易待故舊有恩義居官不爲崖異

御賜清慎勤及敬一堂額子漣洞澍浩漣字檀人康熙己丑進士改庶吉士授編修時征策妄阿拉布坦漣捐橐駝佐軍有

詔褒美進中允督學河南輯中州視學記畧遷侍講請易廟大成殿以黃瓦又請做朱子綱目義例纂明史綱目累陞太僕寺卿奏添牧廠二十四處馬駒蕃盛以年老乞歸卒年八十四洞字愷思康熙癸巳進士授工部員外郎歷郎中擢雲南學道革棚規除苛令以父任總督迴避去任奉

命赴軍前辦事至陝補涼莊道時軍出七路皆集城外洞徙民入城捐資賃屋以棲兵兵民皆安調西寧大軍西行由大通河洞倡建大橋以濟軍行羅卜莊丹津者番夷渠魁也涼莊生熟西番連結蠢動洞以涼莊五郡汛兵俱赴戍城中空虛乃疾馳至莊浪料簡精壯千六百人造給鎧仗火藥又團練

涼州永昌鎮番古浪各村堡得六千餘人聲勢壯盛大將軍倚之檄委統領官兵土兵會同進勦副將以下咸聽調雍正元年十月誓師於定遠城分兵爲三道並進轉戰於棋子山山爲賊之門戶勢陡險洞佯若仰攻而別選銳卒繞出其背遽奪其山梁前後夾擊殺賊無算餘衆遁入鐵包城城四面峭壁前有仄徑後臨大通河洞兵攻其前礮轟其後殲賊之半於時羅卜莊丹津進逼西寧分躡甘涼諸處番族應之河檄涼屬鄉勇捍禦自移師武勝爲聲援賊遂遁猶恃阿損一族爲凶暴乃統兵銜枚躡其插帳處出不意殲之遂搗其巢阿損平諸番帖服會蘭撫綽奇劾河虧帑

上嘉其功置不問陞山西按察使轉布政使臨晉民抗糧負固方調兵往勦洞詣其處曉以禍福民皆釋械誅首惡六人餘釋不問奏免大同十一州縣重出草束腳費一萬二千兩並免馬邑縣邊地積欠地丁萬餘兩尋以侍郎銜往肅州協辦軍需念籌邊必先裕餉莫善屯田體訪河道有高臺張掖口外數處皆宜種植黍麥引黑水資灌溉可闢田千頃繪圖以奏報可於是開三大渠列斗門數百以引水而蓄洩閘壩大小橋梁復以百計閱五月工成留屯二年懇田三十餘萬畝言者以洞侵帑誤工墾吏議大吏交章雪其誣洞已卒澍字音傳官長蘆運使管天津關以廉幹稱卒於官浩字廉叔官

德安知府洞子榆字玉材有至性母病目餽之五年得愈任  
寶坻知縣澍子柟字廣蔭九歲能文雍正庚戌進士官工部

主事

昭文志參陳世倌狀蔣懋志銘

○陶元淳字子師少英敏過人於三才萬物之理古今因革利  
病無不講求精審志欲有爲康熙戊辰成進士對策請減東  
南財賦詞極剴切主者抑之除廣東昌化知縣始至逢歲旱  
徒步禱峻靈山雨立降縣有浮糧賠數百年力請蠲除不能  
乃句稽本末作浮糧考奸民隱占飛灑愚民重困乃行清丈  
法兩年始竣作魚鱗冊剷除公私陋弊作會計經費錄創立  
墟市招流亡集商賈禁戢土司加恤窮黎時行村隴間問民

疾苦藹藹如家人父子海外武弁驕橫崖州尤甚元淳署事  
三月盡發其奸狀雖遇赦得寢而將吏由此斂戢以勞卒官  
邑人口祝之其制舉文風行海內學者方之金正希陳大士

陳志

長子貞一字改之一字駿文性聰悟幼習舉子業卽借

刻於人爲何焯所咨賞康熙壬辰進士由庶吉士授編修不  
樂仕進以養母乞歸雍正初被薦與修明史稿具復乞歸乾  
隆初就職半年休致歸居鄉凡邑中利弊必與當事言之常  
昭初分貞一按全邑大勢以東西分治七議上當事疆域以  
定時議濬白茆河貞一言宜濬白茆之裡河至北港口導之  
使歸徐六涇入海建巨閘以拒潮則省費而功可久其他有

益桑梓知無不為工制義兼工古文徜徉里中以卒貞一孫  
廷墀廷埭同舉於鄉皆任教職

乾隆志參  
常昭新志

○瞿孝春字青雷忠宣曾孫康熙三十年進士初知餘干縣以  
廉靜得民服闋補寧鄉縣貢黃絲絹歲糜千金請於上官奏  
免之監司蒞任例求夾山馬即屈產也無馬則納價孝春不  
予亦不納價事遂絕政事之暇未嘗釋卷日與諸生孜孜講  
論兩地文風興起攝介休厚給驛馬芻豆價紓驛卒之苦當  
代還兩邑民交爭之卒於任子仕鑑字德操以老孝廉貧困  
以歿

昭  
志

○汪繹字玉輪其先自休寧徙常熟康熙丁丑會試第三庚辰

殿試第一授修撰癸未會試同考乞假送親歸乙酉奉

命編校唐詩於揚州明年事竣而卒繹少年高科文詞敏贍書

法秀整而謙退不矜醞藉多風旨臚唱日馬上口占有歸計

詎謀干頃竹浮生只辦十年官之句竟符其言

曾陳二  
志合纂

○嚴虞惇字寶成弒孫父熊字武伯少為諸生遭亂棄去縱情

詩酒人比之徐渭虞惇康熙丁丑進士第二授編修己卯以

順天科場事牽連鐫級歸起補國子監丞改大理寺副遷寺

正陞鴻臚少卿歷通政司參議太僕少卿癸巳主湖廣試榜

發以勞致疾卒虞惇自為諸生即以功名氣節為己任年近

五十始登第中遭顛踣浮沈又十餘年在大理時不肯碌碌

署紙尾九門提督陶和氣借通倉盜米案鍛入其所怨檀張三者欲寘重典虞惇力持不可卒從未減內務府二格殺無罪者二人傷一人移其事於塾師徐天榮天榮口吃不能自白考竟成獄法司心知其寃莫敢發聲虞惇方移疾上書本寺少卿邵觀歷指其可疑狀且曰腕可斷題不可畫力疾起出不意執二格訊之遂吐實天榮得釋一時稱其仁且勇典試楚蜀皆得人其學根柢經史貫穿三通之書為文典實正

大陳志

○陳逢午字方中父煌圖字鴻文少受業楊廷樞之門以副榜授翰林院典籍遽引歸順治甲午徵前時仕宦之家居者煌

圖年甫壯以親老不起晚舉鄉飲賓亦不赴逢午篤行好學祖母范病足日蹠而摩之范撫之曰兒壯矣何其似幼時也他內行多類此教子讀書以立行為重曰當知文藝外大有事在易簣時命其子毋請諱墓文毋作佛事

通志參  
乾隆志

○曾倬字漢瞻祖道生字立甫精於三禮父振甲字鷺公少與兄肇甲相切劘以孝友聞順治丁亥成進士除貴溪令未之任卒倬少孤力學有聲太學康熙己卯舉於鄉兩試禮部後以母老不復往讀書破山寺涵養有得集古人文之不叛於

道者為善是編

陳志

○錢良擇字玉友性倜儻與人交必出肺腑意所不可盡言招

○過弗顧也游歷幾徧天下所至以詩酒意氣與知名士相結

為詩豪放感激同里王譽昌字露涓為諸生工詩善畫刻苦

鍛鍊邵陵字青門工古文為詩多發天然格律在眉山劍南

間

陳志

○歸鴻字既垣允肅從子父煥記覽該博著有經疑史測鴻以

上海籍登康熙癸未進士知西華縣報最未及遷而歸鴻少

貧窶既官貧如故詩文書法俱工

舊縣志

○許穀字詒孫父豐有孝行歲饑潛典什器易粟供父而私啖

粗糲且每食不飽對父忻然不使知也穀康熙三十九年進

士選庶常出知垣曲縣垣為僻邑訟庭清簡穀以師道自任

口講指畫生儒環侍迄無倦容文風遂冠全晉士人稱為許

夫子濟東鄉沅河使旱地俱成腴田民賴其利稱許公渠丁

外艱歸囊橐蕭然罕入城市子朝字光庭籍昭文九歲失怙

又三年失恃族祖漣教養成立

昭文縣志

年十六工詩古文辭鄂

文端爾泰任蘇藩試七郡士第朝文為冠成進士授廣西懷

遠知縣陞太平府通判署鎮安府奉

恩旨發回安南兇犯宣揚

聖諭安南饋土物力卻之兼署太平府以累罷起補山東德州

通判謁鄉祠黜明嚴嵩黨楊順主順害沈鍊父子者也眾躋

之輯州志若干卷書法得十七帖之神

參唐聖志

○蔣廷錫字揚孫伊仲子少穎敏折節向學負才名康熙己卯舉順天鄉試癸未下第

特賜進士選庶吉士入直南書房尋授編修遷贊善歷侍講侍讀少詹事擢內閣學士充經筵講官雍正元年遷禮部右

侍郎尋調戶部四年晉尙書主順天鄉試丁母憂起復視事六年拜文華殿大學士仍兼理戶部事加太子太傅充

聖祖實錄及明史總裁官庚戌典會試

特恩加一等輕車都尉世襲卒於位年六十四廷錫當內直時

聖祖方稽古右文

命儒臣編纂羣書每奏

御輒付勘校博學精敏同輩咸推讓車駕所至皆參扈從備

顧問佐禮部時凡上

尊謚廟號

山陵升祔

郊壇配享諸鉅典廷錫諳練典故參考經籍議上多稱

旨及爲戶部筦三庫與怡賢親王協心一力剷除宿弊部務爲之肅清明習吏事案牘必親裁西陲用兵軍需調度機政填委廷錫勇於任事應時立辦無少瞻顧以此最被

恩遇所

賜御書扁額曰黼黻絲綸鈞衡碩輔萬幾賢輔他

賞賚不可勝紀及屬疾醫藥勞問之使相望於道病狀日再馳  
奏遺疏聞

世宗震悼為輟朝遣大臣臨奠內府凡喪事加祭一壇謚文肅  
尤工寫生神妙與宋元人爭鬪性豪爽俸賜數萬金周恤親  
舊知交不少吝

賜第外田宅無所增歿後人多思之

張廷玉墓志

○蘇本潔字幼清康熙五十二年舉順天鄉試雍正五年以保  
薦試用閩省署晉江令戎帥縱卒虐民擒治不少貸幾為所  
構旋得直調知侯官縣值歲稔首請題留江南漕米十萬石  
運閩接濟行順莊滾催法民便而課足閩省至今通行焉七

年擢福州府知府引見時條陳便民四事

上喜顧大學士曰閩中州縣第一人言不虛也

賜賚有差既抵郡大吏倚如左右手凡十郡疑獄必令覆讞手

批口答判決若神將題陞臺灣道以母老力辭未幾得疾請

告弗許請調簡許之移守興化聞母病驚悸疾遽革本潔體

貌豐碩美鬚髯善談論聽者忘倦少攻左氏傳撰疑義一卷

論者謂可與顧亭林杜解補正並傳

邵齊然狀

○鄒元斗字少微性孝友工詩畫康熙四十四年

南巡召試授中書科中書隨圍喀喇河屯繪避暑山莊三十六

景并詩恭進五十二年恭與

萬壽千叟宴雍正五年告歸卒年七十二

言志

○邵世泰字季醇曾祖世茂字羽萬順治乙未進士韶州推官

世泰康熙甲午舉人考授內閣中書陞侍讀歷刑部山東司

郎中東省有為父仇殺死怨家者已照殺人律定擬世泰駁

之曰齊襄復九世之仇春秋大之今子復父仇情既實應減

等

世廟是其議遼陽創獲者不問首從概配煙瘴至則多死世泰

請以財主及頭目罪如律從犯概減一等從之擢貴州平越

知府值苗疆兵燹之後氓俗凋敝前官請發籽糧千石大吏

以軍需不許世泰力請給三千石歲亢旱奉檄採買屯餉復

力請寢其事世泰居官十三年做車羸馬衣裘僅蔽體卒後

宦橐罄如苗民裹糧舁櫬至鎮遠登舟始去子玉瓚字廉夫

諸生父歿承志不受賻萬里扶櫬歸克盡喪禮性謙謹好讀

書嘗纂歷代沿革輿地說年八十三終

道光志

○歸宣光字念祖允肅孫康熙五十九年舉人授內閣中書遷

侍讀擢御史轉兵科凡所論建大率謹廉隅杜積弊不為苛

刻近名之舉奉

命巡察湖廣請墾即襄各處及苗徭谿崗可耕曠地給民牛種

前後共墾水旱田十八萬四千二百餘畝民賴其利以新闢

永綏苗地米少山水險迅苦於輓負兵民日用不供請於藩

庫撥銀二千兩交官採米運倉平糶以備不繼又陳沿江沿湖水汎塘房既慮水患移居高阜兵隔水次不便巡警請添巡船往來駕駛以備倉卒擢鴻臚寺卿右通政進通政使充殿試讀卷官故事非曾任翰林官不與宣光以乙科三任其事陞戶部右侍郎歷吏兵工各部遷禮部尚書署吏部調左都御史終工部尚書

皇太后七旬萬壽

上集諸王大臣年至耄耋者爲九老之會并繪以圖宣光名在第六

御製詩三章賞賚最渥明年卒於位年七十二

諭賜祭葬

賜諡昭簡宣光性謹恪遇事和平練達未嘗矜已傲物亦不肯

詭隨人歎歷中外多所建白晚年創立常昭會館里人至京

者有所依庇史貽直狀次子熙字輯之能書任山東鹽運司經歷

舊縣志

○孫德威字畏侯魯子博雅而不自炫家居食貧嚴虞惇邀至

京時掌院納蘭揆敘被

命有所編纂延致德威凡所撰次皆稱

旨方欲薦聞堅辭而歸同邑趙廷珂字聲倍少游太學工詩

歌善書法與太倉吳曠等相倡和大學士陳廷敬重其才令

其校秘館諸書尋以病歸晚精醫術兼通琴碁行草尤入妙

品乾隆志

○陸輅字載商問禮從子父尊禮字季恭薦授翰林待詔以例

授陽曲縣丞擢知恩縣東昌通判移撫州重建玉茗堂於故

址落成集僚友及知名士張樂讌飲一時傳為美談新城王

士正嘗歌其事家居賑饑贍貧育嬰樁死小者獨為大者倡

舉九與賓筵年九十三而卒陶志

○張瀾字斗南陝西蒲城知縣少年筮仕吏民望而易之不逞

之徒什伯為伍橫行市上瀾廉其魁置諸法餘皆帖服

聖祖西巡上官檄治馳道瀾以地非孔道不宜先事騷動休之

以威卒不應曰若有罪令請當之大吏嘗讌其屬卒然謂瀾

曰聞江鄉多產木棉未之見也出一素筵授瀾令寫其狀瀾

泚筆為木棉二本令更題之瀾立成四句曰盡道木棉好還

愁地不肥關中百萬戶卒歲半無衣大吏嗟歎良久欲薦之

遽病卒曾陶志

○李安臣字天生諸生偕王孫蕃叩

聖祖行在上書請減賦反覆千言遠近傳誦昭志

○張汝璧字崑明力行善事子尚謙克承父志飯飢絮凍樁死

窆櫬不惜費為之尚謙子國綱肆力於學雍正癸卯舉人昭志

○張爾翔字集之歲歉輒行糜施樁嘗過陳涇聞破屋中哭聲

詢之以窮將鬻其妻周之以金俾得完聚閩人拾遠賈遺金命速還之其人方思投河竟全其命子九苞喜為詩通志參昭志

○陳洪謨字九書諸生賦性介特其徒以狂直忤時貴命學官捕笞之勢甚迫洪謨匿其徒挺身與時貴抗卒得免家徒壁立不降詞色以求人子一本亦狷潔士昭志

○席永恂字漢翼父啟嵩字文夏官虞衡主事自洞庭東山徙居常熟性孝友好施予賑貧救荒率先倡導列祀鄉賢永恂生而沉靜寡言笑與弟前席受業於陸清獻公皆能深思默念求實踐之學為陸門高弟追隨十有六年清獻歿刊其遺書行世候選國子監助教前席字漢庭八歲能詩時值暮雪

父命賦詩應聲云光搖窗不夜風定樹飛花父大奇之以例

候補內閣中書康熙志

○王琛字匪石少勤學能文章入京師客游公卿間康熙壬辰以監生修書 武英殿明年授四川內江知縣雍正元年年羹堯總督川陝欲引琛自助將奏移陝西琛固辭及年敗得免旋攝灌縣事嘉定府屬之洪雅縣與雅州府治相近中隔崇山轉運者必紆水道數日始達舟行激湍覆沒者衆時方用師西邊上官檄琛通餉乃按驗地圖鑿山開道旬日功成自洪雅達雅州不過百餘里人皆便之五年署榮昌縣脫良民被誣為盜者十四人在任八年遷紹興同知未行以決罰

不如法被議落職歸九年以蔣文肅公薦

命往陝西以同知督邊運十一年引見

命往廣西以知州試用權全州州有農婦孀居田主迫淫之婦

不從自經死前官不爲理琛察其事出屍土中按驗得實抵

田主於法而旌其婦州人大悅乾隆元年調永安再調永康

以老病乞休卒年八十三

彭啟  
豐傳

○嚴有禧字厚載虞惇孫雍正元年進士授河南涉縣時總督

田文鏡政尙嚴厲屬吏望風懾憚有禧強直敢任事擢知山

東濱州田故與東撫岳濬不相能陰屬有禧察動靜有禧曰

吾豈能譖人以求進乎久之竟無所白遷萊州守擢登萊青

道調糧儲道丁內外艱服除補湖南岳常澧道民隄湖旁涸

陂爲田水勢盛輒潰漫而民以墾闢請者相繼兩院下有禧

勘狀有禧言此皆游食好事之徒欺隱愚魯恣爲科斂及至

決溢告災求賑與胥吏表裏爲奸因條上其弊圍湖之議遂

格澧民蕭六表告所怨劉太玉譚如山及諸生車禹殿等有

逆謀軍門某聞之遽捕繫諸生等會將肄兵於澧民訛言兵

至相率驚竄有禧察其誣立爲伸雪縱遣而歸馳書帥府止

其兵澧民乃安擢河南按察使調貴州以疾解職疾平復爲

河南按察使調湖南坐累鐫級歸有禧持風裁容止威重讞

鞫務矜恕人皆憚其剛而服其平少貧困及仕居處儉約歷

官三十餘年家無贏資州里敬事諮訪地方利弊侃侃直陳  
修葺先世祠墓編纂宗譜刊刻太僕遺書數種行世 邵齊燾墓志

○陳祖范字亦韓號見復逢午子生而穎異少習舉業有師法  
雍正元年舉鄉試其秋舉會試以足蹇不預 殿試歸明年  
補行正科當 廷對親朋皆力勸之曰吾少無温飽之心徒  
勞苦奚為者於是傲屢華漚之濱榭戶讀書生徒裹糧相從  
居數年有

詔天下設書院以教士大吏延主蘇州紫陽書院三年訓課有  
法又主徐州之雲龍安慶之敬敷揚州之安定或一年或二  
年輒辭去曰士習難醇師道難立且此席似宋時祠祿仕而

不遂者處焉吾不求仕而久據其位不可乾隆十五年

詔內外大臣薦舉經明行修之士知者交章列薦明年

上命閣部大臣於所舉中核其名實允孚者得四人祖范居首

其三人則無錫顧棟高金匱吳鼎介休梁錫璵也皆授國子

監司業以年老不任職與棟高皆在家拜受

新命朝野以為異數云又二年卒於家年七十有九祖范於學

務求心得不善馳騁其說與古人爭勝尤恥勦襲成言以為

已有其論易不取先天之說謂易本隱以之顯學易者務舍

顯而求隱未求文字先觀圖象且帝出乎震一節方位顯然

以數往知來為先天圖之注腳未免牽合儒者於經所無則

信之於經所明言則疑之何也論詩謂朱子不信小序是其  
謹慎處亦卽其師心自用處詩之體格古今不同作詩之故  
亦古今不同古時君民朝野不若後代之闊絕指陳時事譏  
切宮闈不若後代之忌諱朱子以後代詩人之習上觀三百  
篇故於小序覺其迂闊牽強而難信也謂論語賢賢易色主  
夫婦而言賢賢如關雎之窈窕淑女君子好逑車牽之辰彼  
碩女令德來教好德非好色故云易色也造端夫婦道理甚  
大若賢人之賢交友一倫已包之矣又言世俗有非禮之禮  
三承重也繼嗣也葬服也古者人子有爲父後不爲父後之  
分漢時詔令尙云賜爲父後者爵一級爲後者承爵祿奉宗

祀而傳之以重者也應爲後之子亡則適孫承之而爲之承  
重今士大夫不世爵旣無重可傳而漫於喪訃立長孫承重  
之條駕名諸父之前禮果然乎古之爲人後者後其繼別之  
宗耳宗不可絕是以後之若餘人無子不皆立後其資財入  
宗子之家以宗子祭無後故也自宗法廢而收族之道亡資  
財無所入勢必立其近屬以奉祭祀然風俗澆薄無資財者  
委而去之稍有絲粟之貽卽攘臂而爭此禮所稱與爲人後  
者與賁軍之將亡國之大夫同其可恥者也古之葬有常期  
過期而不能葬則主喪者不除唯改葬則總者不可以無服  
送至親也今葬無常期遠者至一二十年爲子者不能守未

葬不除之禮卽吉已久忽焉返其初喪之服而葬是以僞事其親也喪事有進無退而如此不亦舛乎必不得已假用改葬之總事畢而除之或亦亡於禮者之禮也或問祖父母之喪父爲長子旣服之矣未及葬而父死及其葬也嫡孫承重可乎祖范曰古無除喪而後葬者故有改葬之服而無葬服無葬服又安得有爲葬而承重之服且未承重於居喪之時而承重於除喪之後於實不符又沒其父之曾居父母喪尤不可也又問甲爲庶出旣貴封其母母後甲而亡甲之子議所服或曰宜如父在爲祖父母期或曰宜如父歿嫡長孫爲祖父母服重二者安從答曰禮時爲大古人嚴厭降之義生

母服最輕禮失而母以子貴遂僭而並嫡至明太祖之制極矣然至今承用之此時論禮因時爲宜父歿而用嫡長孫爲祖父母服重之制於律雖無明文亦無明禁體其父之隱而爲之服重於心亦甚安觀過知仁君子當憐而予之必格以嫡庶之分斥爲不韙試思身爲庶子旣不可卑其母身爲庶子之子又可卑其父之母乎又與人論史記謂孟堅譏子長先黃老而後六經此子長述其父說則然其所撰五帝本紀贊首推尙書列傳開端云載籍極博猶考信於六藝可謂之後六經乎列老子於申韓而進孔子爲世家稱老子不過云古之隱者而於孔子曰可謂至聖矣至聖之稱至今用爲廟

號匹夫而躋世家卽世世襲封之兆也弟子七十餘人合爲

一傳卽堂廡從祀之端也竊謂孔氏之道得子長而始定一

尊雖從祀廟庭亦不爲過也同縣王峻顧鎮孫夢達湯愈先

後游其門皆知名

錢大昕傳

○沈淑字立夫萬育孫雍正元年進士選庶吉士授編修假歸

尋卒淑天資過人自幼卽能遍讀諸經注疏宋元儒經解

陳志

○席釗字對揚永恂子性敏工文詞雍正癸卯進士選庶吉士

以薦與修一統志授編修以艱歸卒釗敦孝友之行生平重

然諾常爲人貸錢二百萬其人遠宦不歸破產代償遂至大

困兄鎬字渭南附貢生博學工詩弟鏊字寶箴以舉人授內

閣中書書法迺古詩文清雋

陶志

○王峻字次山祖應祥父志學世有隱德力行善舉峻少敏慧

受業陳祖范之門舉京兆試授內閣中書雍正二年進士改

庶吉士充一統志纂修官授編修歷典浙江貴州雲南鄉試

稱得人改御史拜命三日卽抗章劾臺長官素行不叶人望

直聲震都不會丁內艱遂歸杜門養病十餘年當事爭延爲

士子師厯主安定雲龍紫陽書院以古學提唱後進所賞識

後多知名性剛褊視時俗依阿齷齪畏蕙者流不欲爲伍人

有一事一節之長則稱賞不置究心經史考訂精審尤精輿

地之學於九州山川形勢曲折向背雖足跡所未到咸瞭如

指掌嘗謂水經正文與注多混淆欲一一釐正之而唐以後水道之變遷地名之同異鄙注所未及者則撫正史及傳記小說近代志乘以補之名曰水經廣注手自屬稿未暇成也詩古文直抒性靈不假修飾書法初宗北海後師東坡晚年自謂窺古人用筆之妙所書碑碣盛行吳下峻少貧甚數歲時借人書讀日受訾詈後登清要不名一錢歸田後猶以教授自給環堵蕭然門無雜賓子本智由盱眙令遷桃源河務同知錢大昕墓志參自敘

○孫天寅字雲含魯家孫少聰穎讀書過目不忘十歲能詩負其才目空一世年四十八舉雍正二年京兆試旋舉博學宏

詞兩江第一未及試得疾卒陶志稿從弟瀧字巨源少從嚴虞

淳游屹吃汲古貧不能省試太僕官京師寓書招之且資以

行李卻不赴所著讀史談助藝圃春華皆散佚弟淇字寶洲

才名與兩兄相頡頏時稱三孫一應院試即棄去肆力於古

天寅子燧字元之亦博學能詩舊縣志

○謝晉字日三祖爾綱父錫蕃歲饑為粥食餓者時晉五歲進

日糜薄恐不飽又不得懷去不若易以餅祖父大奇之雍正

四年舉於鄉為人和易篤於倫理侍母病衣不解帶者經年

與兄庠生毅弟舉人發友于式好終其身後以明通除礪山

教諭礪之諸生往往為吏胥凌轢晉申狀學政飭郡守按諸

姦猾士氣為振嘗受郡檄捕蝗晉默禱於神次日蝗盡墮地

死 邵齊壽墓志

○丁斌字維翰父湜與同志創建育嬰堂廣仁局力行不倦斌從吳士玉遊為入室弟子公車入都同里蔣文肅延之為師雍正五年進士謁選授休寧縣時州縣爭尚操切斌以古法化導以事忤上官罷歸僦居五渠家徒壁立卒年七十六幼子晉高諸生工詩貧困死 陶傳畧

○宋顧樂字玉才居東唐墅生而穎敏五歲入塾受書一再讀即能背誦少長習舉子業天才秀挺出語無俗補吳江諸生第一學使者意其宿儒及進謁則翩翩年少益歎賞不置旋

食餼蜚聲鬻序年二十九遽卒其師陳祖范深惋惜之 王應奎傳

參舊縣志 又沈翀字石虹東鄉人工詩古文天才挺拔從何焯游

不數月遣之歸謂我所能者子皆已知之留此何必每語人

以韓慕廬為比歸家年少病歿 謝元陽傳

○瞿駿字雲墀壯歲游京師屢試不遇康熙庚子中副榜雍正

五年保舉令下有薦之者

命往河南以知縣用時田文鏡為總督駿惡其殘酷稱病不赴

為人狷介有守雖貧甚不肯干人居京師五十年未嘗至貴

要之門詩文古淡如其人年七十餘終於僧舍 乾隆志

○馮璟 道光志作燦今本 字次周少貧困寄籍順天雍正七年

舉京兆試授內閣中書軍機處行走密勿清要謹慎緻密擢御史歷遷至府丞畿輔重地勤於職守吏畏民懷攝京尹事以同官累降補中書陞侍讀時內閣侍讀學士無漢缺軍機大臣奏請添設一員為璟陞階而璟以疾卒子重字伯厚年十七以宛平籍中式任清溪知縣重子鉅字研組陝西籍解元 陶傳

○席雍字嗜仲前席子以例授刑部員外郎遷郎中出知鄖陽府時方議開墾屬邑承風增數虛報雍行部勘退其不實者擢陝西督糧道權按察使臨潼大猾康某淫殺數案巧脫問官別捕民陳姓當之雍察其寃論康如律尋入為刑部郎中

告歸卒子紹元字大之以四川鹽課大使署彭山縣民間轆轤引水灌山田不勝勞紹元鑿通山泉築堰溉田萬頃民德之次子紹凱字獻之以舉人歷知山西聞喜安徽宿松等縣精於治獄所至民懷弟襄字成叔兩浙運副襄子紹容字敬堂以例授戶部員外郎慷慨好施周恤親族有祖父風 舊縣志

○龔克庸字叔度父大潛字雪航善填詞得宋末諸名家遺意克庸好讀書丹黃雋校精整可觀家酷貧晨炊常不屬得錢即為具留客其醉不為明日儲也工駢體文尤善為詩貧甚挈家之長安蔣文肅廷錫厚遇之由教習任竹溪知縣嘗修廢堰為民利邑人名之曰渤海堰卒於官 陶志

○蔣溥字質甫廷錫長子雍正庚戌進士選庶吉士授編修進侍讀

高宗卽位擢左春坊庶子陞侍講學士遷內閣學士兼禮部侍郎陞吏部右侍郎尋轉左兼刑部侍郎兩部事多所釐正旋命署湖南巡撫值歲儉奏出常平穀平糶不爲限制民食以給楚南舊不知蠶織溥涖湖之歲長沙諸處野蠶成繭大者如雞卵繅治之每顆得絲數銖以上因下令民間收採遺種教以飼蠶練絲之法明年蠶事大興楚南泉布少流通民多盜鑄又薄小不任使用雖嚴禁不少息溥察知辰永山谷間多產銅試採有驗遂奏請設鑪座鼓鑄兼買黔粵餘銅廣儲工

本錢出益饒兵餉役食孤貧廩給悉資配撥餘者發肆平賣俗用小錢悉以官錢易歸礪冶僞鑄之風不戢自止洞庭湖濱曰文洲圍者故官地也豪民爭擅爲利藪植菱養魚歲收厚息往往結訟溥親履勘爲築堤加防涸以成田得上腴若干頃分給貧民耕種限以三年起科利興而訟衰止嶽麓有南軒書院年久傾圯溥規而新之奏請

御書道南正脈匾額懸於講堂延名宿爲山長越二年仍入爲吏部侍郎軍機處行走進戶部尚書加太子少保乾隆癸酉淮揚水災有

詔截留江蘇漕米四十萬石復酌留本年秋撥銀兩以備賑濟

溥慮秋撥冊檔到部尙遲請將春撥所留協濟鄰省之項先儘本省濟用賑務無誤尋奉

旨協辦大學士兼署禮部尙書掌翰林院事 車駕行幸溥頗扈從

賞賚無虛日晉東閣大學士兼戶部尙書卒於位溥性寬厚而警敏絕倫通籍後精心奉職凡所陳奏無不深契

上旨前後

賜匾額曰經邦濟美曰韋平世澤

上親臨視病者再及卒

駕親奠輟入門哀慟悲感左右加贈太子太保

賜祀賢良祠並祀鄉賢諡文恪

聖駕南巡追念溥世臣舊勞歷次遣官至墓所致祭著爲令典

言志子樛賜榮元樞樛字作梅乾隆辛未進士選庶吉士授編

修尋擢司業翰林侍講襲輕車都尉卽家授左副都御史晉兵部右侍郎轉左侍郎以疾卒於官

賜祭葬賜榮字戟門官至戶部侍郎倉場總督元樞字仲升以舉人任福建知縣歷陞臺灣府知府重建木城培塿爲複濱

海處增創堞樓礮臺規畫經久護理學政添立澎湖人應試者爲澎字號歲科取進一名增葺文廟學宮禮樂器皿咸備

俸滿歸卒 舊縣志

○陶正靖字墀衷元淳次子雍正庚戌進士選庶吉士授編修乾隆二年改御史遇事敢言時令翰林科道諸臣輪進經史解正靖所撰

上大稱善越次陞一歲中由鴻臚卿歷右通政左僉都御史尋擢太常卿方謝

恩召對忽忤

旨鑄級歸卒年六十四正靖天資高朗讀書務實用不喜華縟所作古文奏疏雅健條達一時罕及性伉直遇人無粉飾是非所在盡言招過不顧篤於友誼能赴人之急雖嗜酒好博不拘細行而大節多可取云

乾隆志

○謝元陽字憲南以拔貢舉順天鄉試雍正八年進士觀政河南會有通志之役當事屬以編纂元陽發凡起例正訛補缺人物志則詳薛文清所以尚理學也名宦志則進盧忠烈黜楊嗣昌所以辨邪正也補載魚希直陳益吾所以表廉吏獎勞臣也復奉檄移粟賑飢舳艫銜接無少虧耗嘗貽友人書曰修書數萬言不曾駁壞一字一句運米數千石未嘗虧損一粒一毫元陽無書不讀嘗搜輯邑人工於文而不遇者編虞山人文前後兩集各系小傳寒窗宿齒賴以不泯

行畧參陶敦和

○錢鋈字貢金雍正十三年舉人授撫寧知縣撫邑百餘年未

蘇州府志 卷一百一  
有鄉舉者自盞爲令教其邑士不數年舉者不絕以才調江夏羅田奸民馬朝柱與陽邏吳南山謀不軌盞搜獲其魁擢知蘄州歲大祲米踊貴盞請出荊州儲軍米一萬斛平糶民以無飢治行累擢知黃州府尋監司浙中以憂歸服闋補甘肅哈密道會改滿缺移陝西旋陞陝西按察使調四川綜西征軍餉不一月就陞布政使凡置郵稽速兵器利鈍輸輓更代下不病百姓上不誤軍國悉心調度隨時以機宜入告無不稱

上意凡五年統計金川口內外支用軍需八百七十一案銀五千二百五十九萬有奇千頭萬緒句稽考覈秩如也倥偬中

不忘文教修禮殿葺講堂與書院士講學不輟奏請

陞見中途疾卒

恩加侍郎銜盞居官恪慎位益高心益下宦跡所到輒繫人思其去黃州也傾邦士人舟送數百里其監司巴里坤將去者民抱哈密瓜以獻盞留其一土夫嘉歎曰前有一錢太守今

又得一瓜觀察送者皆涕泣而別

常昭合志

○趙森初名貴樸字再白

道光志

曾祖廷爽諸生嘗上書請減

蘇郡浮糧祖茂良讀書砥行壽踰八十父友倩善醫術爲人已病不責酌貧者更與之藥森九歲能屬文嘗準長卿上林作虞城賦數千言宿老歎服雍正十三年舉於鄉名益高賣

蘇州府志 卷一百  
文長安大書榜其壁云聖賢豪傑在我不干命事富貴功名  
由命不干我事其明達健決如此先是森嘗受知於鄂太傅  
爾泰及戊辰司衡者爲太傅長君知者咸爲森慶森投筆起  
曰試固未必遇果遇我無以自白矣竟不試考授內閣中書  
試理閣務尋以他累罷森舉意闊遠好爲其難有乞請者罄  
橐周旋弗恤卒以是絀與仲永檀同年仲劾九門提督鄂善  
天子以爲直超遷僉都御史森與書以爲薦賢受上賞古有之  
矣劾人受高官未前聞也此位宜辭宜薦賢者時人稱之願  
墓志參弟貴棡字可法才亞於兄由舉人與兄同考授內閣  
中書官至福寧知府陶傳森子同翮字振六性至孝學有根

蘇州府志 卷一百  
抵以乾隆乙酉舉人宰甘肅徽縣通省捏災冒賑同翮任五  
年獨無染及事發收令多搜網大吏重其廉調張掖有惠政  
潔已如故謝事後以交代不能卽歸張民醵金代償歸理故  
業工詩古文詞善楷法人爭師之言志  
○魚翼字振南自號烏目山樵明開封守侃九世孫雍正甲辰  
鄰人不戒於火時母喪在殯燈將延及翼守不去憑棺大慟  
俄見煙燄中一人元冠絳衣立反風滅火他屋悉燼殯室獨  
存侃墓地爲土豪所侵翼大治具會族人誓返侵地訟之官  
三年始得直贅神道立墓門列樹松柏費不貲皆獨任之徐陶  
傳璋

○方志貞字端吾小時戲母膝前母撫之曰兒今雖孝有妻子

恐不復然卽悚惕不寧及娶孺慕不衰母歿哀毀幾殆夜聞

父警欵必起父患痢嘗惡驗味進參苓父憐其貧卻之乃爲

液雜酒糜中不使知也父老無齒以小嚶乞乳於鄰風雨無

間父年九十四卒志貞已六十哭之慟亦卒

錢志

○曹天佑字御玉父與兄弟不相得天佑曲爲調劑卒使同居

式好丁卯冬母失足墮河天佑入水負母浮數里得不死遂

病嘔血戊辰父樓居失火天佑冒火救父受傷而斃妻孫氏

亦苦節乾隆二年旌

舊縣志

○葛光熹支塘傭工也襁褓中喪父母鄰媪抱而育於葛事繼

父母盡孝傭工得一壺一盞必以奉親妻偶失舅姑意遂棄

之父歿光熹將賣身買棺鄰里義而助其終事每荷鋤長號

路人爲之感泣又以賃春餘積舉先世數棺並葬焉

錢志

○張友誠松江人徙常熟早失怙恃顛沛流離始爲人刺舟人

愛其誠信乃得婚娶於是徧求父母棺骸不得偶遇一老尼

相與敘述乃族姑也爲言當年兩棺借停墻間破屋屋傾樞

塌聞墳丁棄骨河干墳丁亦不存矣友誠號哭奔赴其處躍

身入水鄉人援救得不死乃刻木爲兩親像飯必祭舉動必

告久乃葬其像於北麓廬墓哭泣感動路人

曾志

○戴兆箕字傅生與顧鈇顧鎧吳格相友善三人皆貧困兆箕

○亦止薄田數十畝鉄無子依壻以老格與鎧先歿鎧一子不能娶格惟一女流落為豪家婢兆箕贖歸配鎧子且分以田屋鉄聞其事扶病往謝兆箕視其病將不起謂日子無憂身後也吾妻死製兩棺者為子地耳未幾鉄歿斂而葬之江南通志

○殷鉉字明遠諸生初邑令張燮赦後斂租又增白糧折價鉉父元毓不平以其事聞於總督蠹吏石攻玉吳泰來陳堯夫等與燮合謀誣以罪斃之於獄鉉誓復父讐奔訴督撫燮執鉉拷掠復賄承問李分司者殺以滅口獄方急分司子忽暴亡乃停鞫會鉉僕金恩王科控憲移獄得不死後解金陵與吳泰來同禁將被中傷俄迅雷起空中泰來震死羣兇魄喪

獄遂定燮革職擬罪石攻玉斬餘皆流鉉事母孝母歿廬墓

三年督學魏學誠奏旌其門周夢顏傳 參曾志

○程允元字最先年六歲見母病目呼號不食跪母膝上捧母目舐之人稱為孝童及長鄰火延及父寢父方疾篤冒死從

烈焰中負父出焦爛而卒曾志

○趙嗣孝字太原繼伯父世鐸後世鐸歿母陳氏欲殉嗣孝哀懇母乃緩死後出帶示之曰我欲以此終為汝孝故得以天

年終矣母歿負土築墳廬墓五年後以薦為宗學教習授青陽教諭陞鹽山知縣未赴得疾卒疾亟時以已田分給諸弟為鄉里所稱雍正十三年旌表又同邑王子齡呂連席永昇

孫穀純王樹聲錢邦憲陳模湯之仁程永祖俱雍正乾隆間

以孝行旌乾隆志又王世熙李文龍亦乾隆中以孝行旌言志

○蘇宗芑諸生母張氏疽潰不治籲天求代夢一老人指往興

福寺求醫次日果遇老僧昇藥一丸而愈及再往問寺中無

此僧也雍正十三年旌通志

○方煥先字南枝七齡侍父膳父或他出不敢先食隨父泛海

颶風覆舟煥先獲援痛父葬魚腹翻身入海恍忽蘆葦中有

前導者瞬息達一處為崇川之吳家沙其父在焉居民驚歎

送之歸至今吳家沙又名見爺沙乾隆四年旌方熊文集

○潘滌常昭合志字太液幼喪母父章宇游粵不返滌婚畢拜辭

繼母黃子身徑行至粵徧訪不得夜夢神告以閩南武平語

即至武平境又不得見巷口顏武平里有老僧指示方袍朱

履者曰非爾父乎方注視間已失老僧所在滌趨前跪而呼

父父不識告之故父日記吾子左足心有赤痣驗不誣父子

相抱泣束裝歸里父歿廬墓三年乾隆五年旌陳士林傳

○王松齡字御凡父病卧鄰失火松齡叫天搏額須臾反風滅

火親終廬墓學院張泰交題旌通志參照志

○馬維仁字眉之父志鵬患背疽危甚醫曰脈模糊如有物覆

其上欲定其死生庶為之嘗惡乎嘗之味苦醫曰可療但病

已深毒將內蝕必吮之而後可即力吮出稠膿數升神思漸

清投以劑遂痊明年維仁病瘵臨死戒其妻勿哭泣傷親心

又曰養子以防老也今吾先死有餘辜矣

通志參照志

○吳長生梅李人紮扣為業事孀母甚謹母患頭疽已潰膿血

淋漓穢氣觸鼻長生日夕吮其毒數月而愈

陶志

○陸祿隨父公路夜飲冒雨歸路經洋塘望賢橋祿執燈前導

至橋半父失足墮河祿亟躍救不克而死次日撈得二尸父

子猶緊相抱也

言志

蘇州府志卷一百 吳長生梅李人紮扣為業事孀母甚謹母患頭疽已潰膿血淋漓穢氣觸鼻長生日夕吮其毒數月而愈陶志

